

100
1



蜀域
 巡遊
 五

題詞

吉林英和

鄚注古稱瞭如掌元圃增城究樞做地志不經目親來長爪空
 搔隔輝癢徐生夙擅著述才天使投荒萬里往伊江江水遙濯
 足葱嶺嶺雲低覆穎西域諸城恣壯觀口講指畫胸朗朗探源
 噴薄魚順流作圖繚繞蟲綴網準望高低辨分寸積算迂邪析
 錄兩日遊夜記無閒期筆之於書自欣賞我

朝威德藉以彰直補河圖括地象十年心力誰暨之梨棗流傳
 賴吾黨鄧嶸筠制軍為李唐炎漢溯當時建府開屯李

氣域水
巡道
秀

題詞

自古樹我其真書

明正四年三月三日
那錢桐
為贈

所錢表
有桐那

鄴注古稱瞭如掌元圃增城究樞做地志不經目觀來長爪空

搔隔鞞癢徐生夙擅著述才天使投荒萬里往伊江江水遙濯

足葱嶺嶺雲低覆穎西域諸城恣壯觀口講指畫胸朗朗探源

噴薄魚順流作圖繚繞蟲綴網準望高低辨分寸積算迂邪析

銖兩日遊夜記無閒期筆之於書自欣賞我

朝威德藉以彰直補河圖括地象十年心力誰鑒之梨棗流傳

賴吾黨

鄧嶰筠制軍為鏤板於粵東李唐炎漢溯當時建府開屯非不廣殘

凡 5 特
100
/

學東

碑僅足誌歲月

西域漢裴岑碑唐姜行本碑率多贗本星伯皆手搨之又於燉煌縣搜得唐索勳及李氏修功

德兩碑皆向來著錄家所無者

斷簡無稽歎疇曩既賦新編眩見聞

星伯作新疆南北路

賦二篇頗為賅洽

復成此卷振餘響遠紹旁搜永不磨比似黃經判霄

壤

黃宗羲今水經齊次風侍郎謂其南詳北畧作水道提綱補之不若星伯之專究一方者為足據也

歸安葉紹本

水於天地間脈絡罔不貫兩山閒有川一氣通浩汗遐哉山海

經荒陬闢崖岸洎夫禹貢成波流別枝幹以水志輿地萬古迹

不換是為圖經祖郡國掌上判後人覽遺編星斗識璨璨惟茲

西域地自古樹防扞崑崙書即敘境已統蕃漢厥後置都護河

源溯天半匈奴斷右臂元光功業爛誰知千載後天意掃諸叛

大石鎮河中元祖滅汪罕已萌內附機猶未消戾悍洪維

義軒朝鴻規軼巍煥采入虎彪威長驅犀兕散天西二萬里拓

地盡震且我

皇復嗣服

天戈削僭亂遠徼照

重光捧海澆燿燿遂令甌脫區鼓腹樂燕衍獨是窮荒境幾人

弄柔翰縱有脞說存蕪詞那足玩吳蒼獨搜奇巨手選銀斷遷

客屬詞曹邊籌幸襄贊遂闡十年勤居然一編粲卡倫辨疆理

鄂博表邑閤百川導其源支流交浸灌如循章亥步摩醯協神
算如授庚辰策支祁徵誕謾田疇分屯戍川岳嚴祭裸名王咸
委贄髦士樂集泮
聖人所經畫一一志

宵旰更於紀述中間筆寫清晏煙明林外騎風輕柳下鍛萬物
盡熙熙嬉游逮童冠君本良史才班馬共波瀾承明事著作大
筆重三館復此絕域經異聞恣點竄天山正名誤泐澤黜語譎
唐文審簡錯漢隸摹石研古今重譯壤文獻儼可按此功實不
細山川發異觀天補不周缺地竟恒河埤聲名溢無外共仰

恩波渙從此達梯航不虞游汗漫柳谷正羸糧榆谿早脫針願
以廣

皇謨歡聲臚頌讚

南昌彭邦疇

才不爲世用乃箸經世書經世託空言持論多迂疎先生富實
學焉肯流虛無投荒落萬里足迹周寰區天欲嗇其遇翻以充
所儲已看賦六合還欲追河圖

河圖出荒邈禹貢始造端水於疆域中貫弗爲尤難伏流成沮
洳直瀉奔激湍陵谷變其勢春夏揚其瀾所以見大水聖人有

必觀陸澄任昉外

齊梁間集地理書至二百四十四家

遐思酈道元

粵稽桑氏經班志曾未見地著永安宮定知生蜀漢

桑欽之名不見史傳

或以為東漢時人然經言江水東逕永安宮南永安宮昭烈托孤地也是知生三國時

不有注者與曷由

析枝幹咄哉續鈔堂乃敢肆譏訕

黃宗羲今水經自序頗詆道元其書名續鈔堂本

文

人動相輕口實滋辨難藉非膽力雄繼起能無憚

昔人遭喪亂山川限戎虜求之故紙中鑿空乃齟齬遭逢車書

混所在皆親覩某水與某邱屈指堪僂數縱橫步章亥瓜邪算

勾股想見跋涉時重趼亦何苦

禮言祖左海水實生西方河居四瀆一其流阻且長紀畧仰

成書耳食嗤愚盲重源判南北厥論尤精詳其餘諸穆珂

國語水也

一一分巖疆始信苞符秘待人而後彰

如與父老談我生以前事如居里閭聞忽聞方外異後生互疑

信小儒更驚悸豈知此老才汪洋而恣肆原湧萬斛泉漏補干

秋義溯從太古初今始見文字

窮愁方著書其語殊齷齪試看磊落人下筆思濟物茲編獲觀

成了然快心目行程戈壁避穹廬水草逐上以昭幅員下以安

屯牧世有蔡正甫補正不須續

金禮部郎中蔡正甫著水經注補正歐陽圭齋序而刻之書今

不傳序見元文類中

天文... 不... 西域水道記序... 夫圖經最古尤誇鑿空之奇地志良難必舉導川為重顧職方外紀語涉荒唐雜著開陽功疏原委旁按遠紹罕能向若知津染翰飛文或竟自厓返顧我

西域水道記序

賜進士出身榮祿大夫總督兩廣等處地方前編修國史館總纂鄧廷楨撰

夫圖經最古尤誇鑿空之奇地志良難必舉導川為重顧職方外紀語涉荒唐雜著開陽功疏原委旁按遠紹罕能向若知津染翰飛文或竟自厓返顧我

國家純嘏億千拓宇三萬神禹之迹未遍豎亥之步難周輪臺瀚海盡入版圖兜勒蒙奇視同戶闔自昔恣為誕幻於今辨其謬悠凡名山截業及異產瑰琦巢居谷飲之氓卉服鳥言之俗偶然書彼碎事皆足擴茲咫聞作子部之附庸備庚郵之問訊而已若夫先河後海索隱鉤深奉禹貢為楷模灋水經之流派此則三都賦手空負匠心萬卷學人有時閣筆予同年星伯先生好古與稽嗜奇成癖西清東觀早繙有用之書北轍南轅遠

涉無雷之境積殊方之駒隙決亘古之狐疑撰成西域水道記名川三百併爲一篇分注十千不煩兩手繫源流甚遠作者自言其三難迨梨棗旣成蒙也欲稱以五善何則大宛作傳已有椎輪西域入書益詳蹊徑然而天山未得主名河源安知正出皮傅昆侖之虛依稀星宿之海先生大漠親經前言互證蘇勒本非疏勒焉者卽是焉支曩矩加以重規百聞不如一見是謂補闕其善一也交河沙磧雖有流傳雪嶺冰梯難知實際嘉州熱海徒傳如煮之詩鹽澤迷塗便作鬼方之想今也田沿阿羯攷遺蹟於隋家山表格登紀豐功於偃伯軍資嚮導皆堪聚米量沙驛當載馳一任推車記鼓是謂實用其善二也或旣決而復入或同出而異歸濫觴漸可方舟斷港何由放海爾乃渠開靖逆灌田遠過千屯橋是納林游牧平分兩岸掘井則汲用淺深裁裳則事分砵揭是謂利涉其善三也山河本極

雄奇文章略如混沌燕然可勒弱水無書相逢沒字之碑難爲傳信之記茲者目覩古文手親摹本或摩崖峭壁或梵宇琳宮紀事多有唐文刊字半爲秦篆詩筆成編於今日金石著錄於異時是謂多文其善四也蠅螟喘喙瓠史嘗言魑魅罔兩山經可贊然燭龍事誕冰蠶論歧一物不知三蒼斯缺此則席其有草溯雜俎於酉陽橙槽爲門證方言於薛史鹿麋類合通借則語採劉昭烏鼠穴同攷訂則注裨郭璞是謂辨物其善五也又況中西法備分野不爽毫釐水陸路通記里先明丈尺以至唇判重輕音分清濁諧聲有術重譯無勞旁行斜上祇圓貝葉之書舉正歸餘回部太陰之法雖哀朽蟬斷亦剔抉爬羅可謂有志竟成無遠弗届者矣君之爲此功似披榛彙如束筍問奇不遺一體操觚已越十年豈惟藏在名山洵可懸之通國遠承郵示欣付梓人予於疇昔自木天以載筆喜訪輿圖纂

李唐之全文勤摭志乘雖功疲於掌錄固願塵於胸羅今者勞勞保赤編
籌海晏而不遑勿勿汗青燭炳公餘而姑待寶書觀成於我友珍帚頓觸
乎初心勉分校字之勞重辱弁言之屬方今文獻大備著作如林家擅隋
珠人懷趙璧惟此一書多識在中實事求是左圖右史已兼賈耽之專長
小注大書未改道元之凡例分其一體亦足美觀合此多能可知傳世而
予尤有說焉此記所記匪今斯今榛徑雜處自甘鳥獸之同羣林箐阻深
共哂保蟲之專屬草木不能啟其秀山川無以發其奇何由問正名於百
物詫著書於滿家乎哉幸逢鞆譯同風埏紘如貫九州果大騶衍真可談
天萬里未遙壺公何爲縮地得樂土者聆絕域而幸安居在寰中者飫異
聞以消妄想視彼靈寶在函諾臯作記俶詭雖古彈壓非誇至於車塵馬
跡有是功能巷語街談無非學問擁劉更生之七略何假百城挾桓君山

之一編定逾千戶此則風雨霜露跬步皆沐

君恩史傳文編入手卽成才藻又以見造物之不可測而能事之靡有涯
也想所在披尋鴻筆必景仰篇家之有神僮後來傳播雞林悉震讐
蘿圖之無外

余既藁方輿紀要書成伏念我

國家發祥東土北撫喀爾喀內外諸札薩克南縣臺灣寺衛藏西開伊犁
定回疆幅員之廣千載一時不可無書以紀盛美竊擬考其地理勒成一
編附景范先生書後

盛京熱河臺灣有通志蒙古地理有程春廬先生書衛藏地理有松湘浦
先生書獨西域未有志乘無可依據書故積久未成嘉慶丁丑歲謫戍伊
犁與舊友太史徐星伯先生比屋居見先生所撰伊犁總統事略及新疆
賦漢書西域傳補注歎其賅洽先生又出其西域水道記草稿數卷余方
爲迄書而先後

賜環歸京師松湘浦先生奏進先生所撰事略

御製序文付 武英殿施行好事者又爭爲刊新疆賦漢書補注將以次

開雕水道記先生以此記定本余手寫也因問敘於余余往來西域固不
得其要領然先生緒論竊嘗聞之矣先生之言曰志西域水道難於中夏
者三一曰窮邊絕徼舟車不通二曰部落地殊譯語難曉三曰書缺有間
文獻無徵如喀楚特西之雅布塔爾水歸於西海宰桑淖爾溢出之額爾
齊斯河入于北海中外所限固無論已卽近在邊內天山蔥嶺積太古之
冰雪瑪海噶遜亘千里之沙磧雖在章亥亦將裹足所謂舟車不通也新
疆之界回部厄魯特土爾扈特和碩特沙畢納爾諸種人處其內扎哈沁
烏梁海杜爾伯特哈薩克布魯特霍罕布哈爾諸種人環其外或逐水草
或居城郭嗜欲不同言語互異 國語謂山爲阿林蒙古語則曰鄂拉回
語則曰塔克西番語則曰里 國語謂水爲穆珂蒙古語則曰烏蘇回語
則曰蘇西番語則曰楚復有重譯難通象胥不能盡解者懷鉛握槧烏乎

志之所謂譯語難曉也馬班始立大宛西域兩傳灼然可見者惟龜茲一
河蔥嶺一山而天山莫得其主名大河不知其分合自是以降水經注最
爲古籍乃以南河北河分入於海唐時又移置輪臺改易玉門至於車師
六國康居五城其可知者大氏茫昧所謂文獻無徵也於是有實非古地
而附會者巴里坤有烏爾圖布拉克蒙古語謂長流泉也諺謂爲烏圖水
或以音近謂卽漢之務塗谷蘇勒河在安西州或以音近謂卽漢之疏勒
國又有實見古籍而誤改者如胡桐見西域傳其叢生之地名胡桐窩或
疑爲鳥巢改爲鷓鴣窠又交河城亦見西域傳或以回語音訛誤交河爲
招哈復有以譯語致誤者多歡渡口也而誤以爲水名郭勒謂河也而誤作
果爾爲地名踵訛貽謬不可勝言且新疆之水有地異而名異者如布勒
干河之下游爲烏隆古河額敏河之上游爲錫伯圖河有地異而名同者

庫爾喀喇烏蘇境寧遠城境特克斯河境特穆爾圖淖爾境皆有濟爾噶
朗河古城境喀什河境皆有吉爾瑪台水又有名異而實同者洮賴河之
作討來洮賚陶賴桃來木素爾嶺之作穆素爾木色爾穆舒爾如斯之類
尤不易於決別先生於南北兩路壯遊殆徧每所之適攜開方小冊置指
南鍼記其山川曲折下馬錄之至郵舍則進僕夫驛卒臺弁通事一一與
之講求積之既久繪爲全圖乃徧稽舊史方略及案牘之關地理者筆之
爲記記主於簡所以擬水經也又自爲釋以比道元之注卽用酈氏注經
之例記則曰導曰過曰合曰從曰注釋於經水曰出曰逕曰會曰自曰入
於枝水曰發曰經曰滙又以圖籍所紀異文踳駁使夫攬者歎其混淆一
以

欽定西域同文志寫之而釋其可知者斯誠有條不紊矣每卷之後各附
以圖蓋先生孜孜不倦十載成書吾知其必能信今傳後豈獨資余續顧
氏之書也哉道光三年錦里龍萬育敘

西域水道記

卷一

羅布淖爾所受水上

卷二

羅布淖爾所受水下

卷三


哈喇淖爾所受水

巴爾庫勒淖爾所受水

額彬格遜淖爾所受水

喀喇塔拉額西柯淖爾所受水

卷四



巴勒喀什淖爾所受水

卷五

賽喇木淖爾所受水

特穆爾圖淖爾所受水

阿拉克圖古勒淖爾所受水

噶勒札爾巴什淖爾所受水

宰桑淖爾所受水

敘曰廣谷大川異制民生其間者異俗況其在要荒之外哉西域二萬里
既隸版圖耕牧所資守捉所扼襟帶形勢厥賴導川乃綜衆流條而次之
首曰昆侖惟帝下都渾渾泡泡暨於泐澤潛行地下化益所疏記羅布淖
爾所受水第一漢表六通至今利益寘安籍端中部舊迹孔道所經魅積

斯闢記哈喇淖爾所受水第二白山之陰曰蒲類海我疆我理原田每每
千耦其耘歲穫則倍記巴爾庫勒淖爾所受水第三何里移之湯湯而白
楊之淙淙翳清軍之扼西亦輪臺之表東雖城郭之已改考川流之實同
記額彬格遜淖爾所受水第四土扈之族疇以蕃之林丹之裔疇使遷之
錫之土田牧圉是并記喀喇塔拉額西柯淖爾所受水第五西域旣平則
建之庭滔滔伊列環流鏡清中函三島取象蓬瀛記巴勒喀什淖爾所受
水第六有白斯海在彼西方處昏而曉當暑而霜惜矣天池佳名不彰記
賽喇木淖爾所受水第七碎葉有二清池居一熱波未聞而克淬鐵不逢
大同斯疑胡質記穆默爾圖淖爾所受水第八元之叛王阻彼金山河名
平安莫揅其患今斯畎澮有恬其瀾記阿拉克圖古勒淖爾所受水第九
洋洋龍骨其流不息有磴可舂有魚可食種人居之以康以殖記噶勒札

爾巴什淖爾所受水第十萬里輶軒靡國不到我窮崖涘奄蔡之微取殿
茲篇聿彰聲教記宰桑淖爾所受水第十一凡十一篇以圖系焉列城相
望具言其地其所不言非水所經也道光初元日南至鄴徐松撰

西域水道記卷一

羅布淖爾所受水上

羅布淖爾者黃河初源所渟滙也

爾雅曰河出崑崙虛色白河圖始開曰崑崙之墟河水出四維崑崙者

岡底斯也凡山國語曰阿林蒙古語曰鄂拉回語曰塔克西番語曰里又國語謂雪為呢蟒依西番語謂之岡梵語謂之底斯

此合西番語梵語以名之也以下一統志西藏有岡底斯山在阿里地

凡言由者皆質言山不用方言極西之達克喇城東北三百十里直陝西西寧府西南五千五百九十

餘里其山高五百五十餘丈周一百四十餘里四面峯巒陡絕高出乎

衆山者百餘丈積雪如懸崖皓然潔白頂上百泉流注至山麓卽伏流

地下前後環繞諸山皆巉巖峭峻奇峯拱列卽阿耨達山也按辨機西域記云瞻

部洲之中地者阿那婆荅多池也在香山之南大雪山之北周八百里注云阿那婆荅多池唐言無熱惱舊曰阿耨達池訛然則阿耨達山亦



當曰阿那婆荅多山矣惟慧苑嚴經音義云準經香山頂上有阿耨
達池四面各流出一河本經為說其義較長是阿耨達山即香山不當
如辨機分 釋氏西域記水經注括地志咸言阿耨達即崑崙蓋阿耨達
為二也

之與崑崙為儒釋之異名而崑崙之與岡底斯又古今之易號矣其山

當京師偏西三十七度五十分極出地三十四度二十分分別為四幹東

出者曰達木綽一作克喀巴布山西番語其水曰崖魯臧博楚凡水

穆珂準語曰烏蘇回語曰蘇西番語曰楚譯語有南流入南海即雅魯

西域記云池東面銀牛口南出者曰郎沁一作喀巴布山西番語其水

曰狼楚西域記云池南面金象口西出者曰瑪一作布宜一作喀巴布

山西番語謂其水曰麻楚西域記云池西面琉璃馬北出者曰僧格喀

巴布山西番語謂其水曰拉楚西域記云池北面頗抵師子三水合為

岡噶爾楚即岡東南流入南海即佛書之恒河又曰枝扈黎大江按華

子口南面者恒伽河出銀象口西面者信度河出而僧格喀巴布山實

西域諸山之宗故十三洲記謂崑崙有四角大山淮南子謂崑崙有四

水也僧格喀巴布山極三十四度五十五分西三十七度三十分當和

闐正南過和闐西北趨千六百餘里發為齊齊克里克嶺齊齊克準語

語多有也凡嶺國語曰達巴罕蒙古語回語喀什塔什嶺喀什見下

日達巴西番語曰拉以下皆質言嶺不用方言喀什塔什嶺塔什回語

謂又西為和什庫珠克嶺舊作霍斯庫魯克嶺即察贊明公瑞道

大小和卓木於嶺下鏖戰三時者也又北折而東為喀卜喀山又北而

東為喀克善山自齊齊克里克至喀克善環千八百餘里包西域西以

周其北總曰蔥嶺外如半規中為虛地是曰崑崙之虛山海經華山西

七里曰不周之山東望渤澤河水所潛也郭注山形七千七百六十

有缺不周匝處因名按不周義近半規疑即蔥嶺黃河初源於此出

焉

初源三一曰喀什噶爾河

回語謂各色為喀什磚屋為噶爾地富庶多磚屋也元世祖紀至元二十五年十一月以忽撒馬丁為管領甘肅陝西等處屯田等戶達魯花赤督幹端可失合兒工匠千五十戶屯田耶律希亮傳中統四年至可失哈里城拜延八都魯傳至元二十一年諸王朮伯命兀渾察往乞失哈里之地為游擊是在元時已為城號元史地理志作可失哈耳曷思麥里傳又作可失哈兒西方有墨克及墨德那墨明史西域傳作默諸國始汗曰青吉斯汗其裔孫派噶木巴爾明史西域傳其初國王謨罕驀德生而神靈西域諸國尊為別諸拔爾猶言天使按別諸拔爾即派噶木巴爾倡回教為第一世初祖生四子皆天以女妻同祖兄阿布塔拉布之子阿里嗣教為第二世傳至二十五世曰瑪木特額敏產四子長曰哈色木遷布哈爾國仲曰木薩遷拜勒哈國叔曰墨敏居故地季曰瑪木特玉素布遷

喀什噶爾喀什噶爾之有回教自茲始也季之曾孫曰瑪罕木特最得

衆心噶勒丹策凌

策妄阿喇布坦之長子綽羅斯第十七世汗

召囚之伊犁並繫其二子長

曰波羅泥都

回人舊稱冲和卓木和卓有道者之稱冲大也和卓木猶言我和卓親之詞

次曰霍集占

回人舊稱

奇齊克和卓木奇齊克謂小也

即所謂大小和卓木者也大軍定伊犁瑪罕木特已死

定北將軍班公第釋二子囚留霍集占於伊犁使効力送波羅泥都歸

喀什噶爾領舊部時乾隆二十年也阿睦爾撒納作亂霍集占乘間歸

葉爾羌與波羅泥都各據城叛二十三年六師問罪次年夏定邊將軍

兆公惠由阿克蘇取喀什噶爾波羅泥都方援葉爾羌聞之遁歸掠人

畜踰山而西阿璉

回人之習經呪者

和濟默爾等六人以喀什噶爾城降其境

東與南接葉爾羌西接喀爾提錦部布魯特

布魯特之部曰鄂拓克今皆曰部以省文

北接

冲巴噶什部布魯特

冲回語已見巴噶什布魯特語手腕也

河水自西出其東故以名之

其河二源北源曰烏蘭烏蘇河

傳記言蔥嶺者莫詳於魏宋雲洛陽伽藍記載雲之言曰從捍糜城西行八百七十八里至于闐于闐境東西三千餘里神龜二年七月二十九日自于闐入朱駒波國其國疆界可五日行徧八月初入漢盤陀國界西行六日登蔥嶺山自此以西山路欹側長坂千里懸崖萬仞極天之阻實在於斯太行孟門匹茲匪險峭關隴坂方此則夷自發蔥嶺步步漸高如此四日乃得至嶺依約中下實半天矣漢盤陀國正在山頂按漢盤陀國今之阿賴地也喀爾提錦部布魯特居之漢書曰西上蔥嶺則休循是矣阿賴東南為喀卜喀山亦曰赫色勒嶺四山注水至嶺下瀦為小池嶺赤而童岸草枯短時時寒風令人慄沮故宋雲言蔥嶺高峻不生草木也赫色勒嶺水東流百二十里逕木克渾又百里逕明

提干又百二十里逕愛依阿提嶺北又百二十里逕康什壩又百里逕別什托海有通布倫嶺水自西北來會水發通布倫嶺之東東流五十里經喀底布拉克有一水自北來滙通布倫嶺水又東南流四十里經努拉又五十里經卡里他布拉克有一水自北來滙通布倫嶺水又東南流七十里經伊亨自伊亨西北行二百里至沙里特嶺又百里至木爾達又百二十里至古里峽又百里至哈布朗庫依又二十里至亮噶爾又八十里至鄂什有小城入霍罕境有一水曰阿克卜古拉爾又五十里至阿爾班又百里至明圖伯又六十里至扈巴三地皆有小城又百里至瑪爾噶浪又百里至霍什圖古爾滿又八十里至霍罕城又東南十五里經喇哈喇喀喇又東南十里經喇哈喇口子有一水自北來滙又東南六十里經稍里托海又東南十里經烏魯胡喀特有一水自北來滙通布倫嶺水又東南六十里經葉斯克期克又東南六十里經稍布拉克有一水自北來滙又東南五十里經倭胡蘇魯又東南四十里經庫蘇胡又東南

七十里經稍布拉克又東南二十里經坎鐵列克又東南五十里經怕
 哈布拉克又東南四十里經漢約換南與赫色勒嶺水匯是為得爾必
 楚克河源處極四十三度四十五分西四十四度二十分河之北岸沖
 巴噶什部布魯特牧地也大軍之追霍集占涉其界酋豪曰圖魯起拜
 者請內附種人數十部吉布察克為之首嘉慶二十年圖爾第邁瑪特
 伏誅部落離散今則沖巴噶什最强所牧自鐵葉爾里葉克嶺北而東
 盡圖舒克塔什卡倫在喀什噶爾城西北九十里至哈朗歸卡倫一百
 四十里東至伊斯科卡倫六十里卡倫邊界成
 守之北三日程地又東盡伊蘭烏瓦斯卡倫蒙古語蛇曰伊蘭回語曰
 伊拉按元史云伊蘭者蛇
 之稱也是蒙古語所自出卡倫在喀什噶爾城
 東北一百二十里西至伊斯科卡倫六十里
 巴爾昌卡倫在喀什噶爾城東北六十里
 西至伊蘭烏瓦斯卡倫七十里東北二日程地乾隆二十
 六年喀什噶爾辦事海明奏言官長保在沖巴噶什之扣喀爾嶺追及

逃人烏朗噶即其境也舊比

布魯特頭人之稱

阿瓦勒者乾隆三十年從討烏

什阿公桂賜之斗酒阿瓦勒飲立盡出被鎖子甲橫矛入賊陣中陣忽

躍馬歸曰賊矛長於我請易矛去所向皆披衆官三品戴孔雀翎子曰

博什輝孫曰蘇蘭齊皆嗣職蘇蘭齊隨捕攻牙墩有功嘉慶二十一年

長公齡奏加二品秩得爾必楚克河東南流逕哈朗歸

回語哈朗歸黑
暗之謂地居山

陰故

卡倫南地產文石黑質白章卡倫西有小水南流入之河色赤蒙

古語謂赤為烏蘭是曰烏蘭烏蘇河回語謂赤為赫色勒故又曰赫色

勒河矣烏蘭烏蘇河又東南流五十里逕明瑤地有舊卡倫焉又東南

四十里逕木什素魯克莊南

木什莊與素魯克莊毗連故亦曰木什
素魯克莊在喀什噶爾城西北八十里

木什水

回語木什人名為汗掌
書記曾以河濱地賜之

發木什莊西山三泉同流復分為二一

東流溉木什莊田一南流八十里來匯木什舊置卡倫今裁自其莊西

北行可達霍罕乾隆四十九年布魯特阿其睦通波羅泥都遺孽薩木薩克捕繫將詣闕其子燕起遁霍罕由此追緝焉

木什莊六十里至汗玉罕又六十里至特

爾勒克地出鉛又六十里至庫舒烏珠黑又三十里至鄂克蘇魯爾道

踰小嶺一又七十里至峩斯克奇克又三十里至色爾里克野塞又四

十里至納哈爾察勒迪又二十里至伊根又五十里至托海巴什又十

里論伊克依雜克嶺又三十里至伊克依雜克布拉克又四十里至庫

庫蘇又三十里至鐵葉爾里葉克嶺下自麓至巔凡十里過嶺七十里

至色里庫楚克又六十里至塔爾噶拉克又三十里至圖巴爾拉克塔

木有敗城周里許為額德格訥部布魯特地又四十里至古勒沙又七

十里至圖古爾克托海中踰嶺二又九十里至鄂什自此以下與由伊

亨往鳥蘭烏蘇河東南流分為渠渠引東岸東流經素魯克莊北漸引

路南而南經霍爾干莊北

在喀什噶爾城東北三十里又東經阿爾巴特莊北

在喀什噶爾城東北三十里又東經伯什克勒木莊南

同語五日伯什白萊曰克勒木地舊有止

不流乾隆二十五年伯什克勒木莊伯克呢雅斯附邁喇木官兵勦捕

收其田園二十九年拔達克山素勒坦沙言霍爾干莊有呢雅斯索不

舊果園一所今伊遷京師其妻子在拔達克山請以此園給之蓋渠水

流通故饒園圍烏蘭烏蘇河又東南流四十里逕蘇瓏莊南分為渠渠

引西岸灌托古薩克莊

在喀什噶爾城西三十里止不流烏蘭烏蘇河又東南流四

十里抵喀什噶爾城引東岸渠二北渠經喀什噶爾城北復東至回城

北折由其東入於河南渠既塞爾們莊

在喀什噶爾城西二里經城西南入於河

自城西門外並渠行至塞爾們莊

帕爾西語塞爾謂首們自謂之詞自稱首領也清流澌澌交

覆濃陰余于役回城暮春三月新疇方郅穉柳緣塍柴扉映溪紅杏成

雨每日與武進劉曙休寧許心田聯轡縱遊彼土耆耋來餉果餌枕流

藉草吟詠忘歸長公齡或款段來就並坐小橋使童子雜收花片自上

游放之為御溝紅葉之戲斯亦域外稀蹤征人佳話矣

南源曰雅璊雅爾河

和什庫珠克嶺東有大池曰哈喇庫勒蒙古語謂黑曰哈喇回語曰喀喇蒙古語謂池曰淖爾回語曰

勒周數百里極四十三度五十分至四十四度十分西四十五度至四

十六度其地哈卜齊克部布魯特所牧也登阿賴山巔以望銀濤一片

上涵天光池東出水東流池西出水西流水東出之岸曰勻布拉克由

勻布拉克並庫勒之北而西百三十里曰乃仔塔什又西百一十里曰

且的爾塔什又西百一十里曰蘇巴什又西八十里曰庫仔爾袞拜又

西百二十里曰野溪里孔又西六十里曰瑪爾札阿斯又西沿水西出

之岸百里曰布魯滿又西一百三十里曰烏努土又西百五十里曰喀

喇拜又西北百八十里乃西渡水曰大河橋梁又西百里曰烏爾塔斯

渾又西九十里為什克南城大和卓木既遁與小和卓木俱緣山行由

塞勒庫勒而北兆公明公督師追之乾隆二十四年閏六月二十五日

師次哈喇庫勒登高瞭望五六十里外有飛塵起選兵千三百人躡其

後二十八日及賊於和什庫珠克嶺賊六千人據嶺上施火器且犯我

左翼前隊我兵迎擊衝至嶺麓向山爭進戰三時賊散復合分隊立圍

日晡伏發賊大敗越山跳而走西域記云商彌國境東北踰山越國經

危履險行七百餘里至波謎羅川川東西千餘里南北百餘里狹隘之

處不踰十里據兩雪山間寒風淒勁春夏飛雪晝夜飄風川中有大龍

池東西三百餘里南北五十餘里據大蔥嶺內當贍部洲中其地最高

也水乃澄清皎鏡莫測其深色帶青黑味甚甘美潛居則鮫鱓魚龍鼉

鼉龜鼈浮游乃鴛鴦鴻雁鴛鴦鷓鴣鵠諸鳥大卵遺殼荒野或草澤間或

沙渚上池西派一大流西至達摩悉鐵帝國在蔥嶺西縛芻河南岸大山之北東界與

縛芻河合而西流按今西流者二支池東派一大流東流陳元奘還至于闐國

進表云今已從鉢羅耶伽國經迦畢試境越蔥嶺渡波謎羅川歸還達

於于闐為所將大象溺死經本衆多未得鞍乘以是少停即經此池也

唐言龍池夷言庫勒色帶青黑故曰哈喇是即南源矣水自庫勒出東

流百里逕察哈爾阿勒爾又東流百里逕哈喇塔什嶺北烏魯噶喇嶺

南同語烏魯是曰圖巴里克河噶岱默特傳云凡言傳者皆乾隆二十八

年喀什噶爾辦事左都御史永貴疏言噶岱默特告回部田畝資溝渠

利喀什噶爾河一曰赫色勒河出喀什噶爾西喀卜喀山漑東南托古

斯恰特同語九曰托古塞爾們喀什噶爾哈喇刻爾同語刻爾漑水多

羅特巴克同語巴阿爾巴特同語欣牌租阿巴特同語牌租天賜也阿

諸邑過巴爾楚克同語巴爾有也滙羅布淖爾一曰托庸河出喀什噶

爾西北托庸山漑東南玉斯屯阿喇圖什同語高處曰玉斯屯下山出

阿爾琥莊莊在喀什噶爾城東北一霍爾干同語阿斯騰阿喇圖什同

低處曰伯什克勒木諸邑與赫色勒河合流一曰圖巴里克河出喀什

噶爾西南吉斯嶺及西界烏帕勒山東流會於圖們此河上流向東浚

渠漑汗阿里克同語謂渠曰阿里克亦曰海提斯袞帕爾西語提斯速

赫色勒布伊同語布伊邊界三邑下流向東北與赫色勒河合流一曰

庫森提斯袞河同語庫森願欲之謂出喀什噶爾西南英吉沙爾舊作

薩爾同語城曰城西羌瑋山漑東北英吉沙爾之各村地畝散流入沙

磧惟赫色勒布伊提斯袞汗阿里克三邑分引圖巴里克一河水不給

用臣偕噶岱默特往視自赫色勒河東南濬渠四十餘里引水入赫色

勒布伊村又托庸河水湍急田畝多被衝刷議建土石隄壩並鑿山石

以弱水勢報聞圖巴里克河又東流九十里逕格斯阿爾雅又東流百

里逕庫依魯克又東流百二十五里逕偽塔克山北又東流六十里逕

伊勒古楚卡倫北又東流數里逕塔什巴里克莊北回語魚曰巴里克

作塔什密里克是曰雅璠雅爾諤斯騰回人謂厭棄曰雅璠坎曰雅爾河深難

越以厭為詞濬成之河曰諤斯騰斯河有引渠之跡故別於達里雅矣

凡河國語曰畢喇蒙古語曰郭勒回語謂自成之河沿河土田肥腴

塔什巴里克莊阿輝孜牙墩恃富萌異志河之南即庫森河北岸吉布

察克部布魯特牧帳在焉其比圖爾第邁瑪特亦桀驁託呼鷹肯盟於

雅璠雅爾之河干嘉慶二十年八月臚作亂賈人高見洛聞其謀先一

日告城中為備孜牙墩知事洩殺伊勒古楚卡倫侍衛走出邊匿於偽

塔克山穴中官兵禽斬之伊犁將軍松公筠往定亂冬祭贊長公齡繼

往余攝幕府行雅璠雅爾河又東流有水自烏帕爾莊西莊在喀什噶

爾城西南一百來匯又東為台里布楚克河又東逕庫森提斯衰莊北莊在喀什噶

里地有軍臺自喀什噶爾南行第一頓宿也余周覽其莊清渠環帶蔬

稼莽葦霍集占之將遁也六月十二日遣阿卜都克勒木告知波羅泥

都將葉爾羌喀什噶爾人眾移往拔達克山約二十四日會於提斯衰

即此莊矣台里布楚克河又東北流與赫色勒河會自疏渠以來灌漑

浸廣水至雅普爾古莊東莊在喀什噶爾城東南涓流每斷所謂水不

給用也庫森河者即庫森提斯衰河也發羌璠山霍集占西竄由伯克

和羅木渡口向羌璠一作羌呼勒逃去水發山東流經偽塔克山南山勢險

峻緣厓立牆水周其陟水又東經圖木舒克卡倫北在英吉沙爾城西

特爾格奇克為圖木舒克河又東南經特爾格奇克卡倫東在英吉沙

卡倫五十里與特爾格奇克河匯特爾格奇克河發吉布察克部

六十里東南至特比斯卡倫八十里

西或水道記卷一

中東南流經特爾格奇克卡倫南又東經特比斯卡倫南在英吉沙爾城西南三十里東南至烏魯克卡倫九十里與烏魯克河匯烏魯克河亦發吉布察克部中流經烏魯克卡倫北在英吉沙爾城南一百里東至鐵列克卡倫六十里二水同流入圖木舒克河圖木舒克河東經英吉沙爾回城南英吉沙爾城置領隊一人轄回莊九調烏魯木齊八旗兵陝西綠旗兵駐之舊城周二里八分高一丈七尺乾隆四十年展築七分南北二門南墉即回城北墉回城東西與鎮城等南北視鎮城三分之一東偏一門出入鎮城者由之置四品阿奇木伯克一人轄其屬回城南里許地曰喀拉克沙阜也高數丈橫百里圖木舒克挾諸水出其間余子夜促騎弦月將落登降危橋殷如震雷又東入葉爾羌境經庫爾塔里木莊北在葉爾羌城北二百三十里庫爾準語積雪也塔里木解見下又東入沙而止

過喀什噶爾城南而合是為蔥嶺北河

定邊將軍兆公惠既定喀什噶爾城方略乾隆二十四年閏六月兆惠等奏言臣等撫定喀什噶爾等城宣布皇恩凡棄賊來投者俱行免罪又查出各城遷來回眾二千五百餘戶一萬二千二百餘人俱送往阿克蘇以備屯田現在喀什噶爾大小十城七村莊回眾各安生業謹將各城及村莊繪圖呈覽并將設官定職徵糧鑄錢及駐兵分防事宜列欵具奏一喀什噶爾地居西北距肅州嘉峪關六千餘里其城周圍十餘里城內回人二千五百餘戶東界烏什阿克蘇有牌租阿巴特赫色勒布伊阿克喇圖什三城伯什克勒木阿爾巴特二大村共六千餘戶西界安集延布魯特內有巴哈喇圖什鄂坡勒塔什巴里克三城塞爾們托克庫爾薩克二大村共二千二百餘戶南界葉爾羌內有英吉沙爾汗阿克喇二城提斯亥哈喇刻爾二大村共四千四百餘戶北界布魯特內有阿喇古城霍爾干村共八百餘戶總計一萬六千餘戶數十萬餘口具載圖冊一各城村辦事應設官職查回部頭目曰阿奇木總理一城曰伊沙噶協辦阿奇木事曰商伯克管理租賦曰哈子管理刑名曰密喇布管理水利曰訥克布管理匠役曰帕察沙布查拏賊盜曰茂特色布承辦經教曰木特窪里管理田宅曰都官管理館驛曰巴濟吉爾管理稅課曰阿爾巴布派差催課曰市瑋協辦都官事曰巴克瑪塔爾專管理園林曰明伯克其職如總今喀什噶爾阿奇木一缺請暫委吐魯番副台吉木薩署理其餘各職臣等查隨營効力之著姓回人及並未從逆

之回人子孫等三十四人揀選補授謹列名具奏一每年貢賦數目查
秤十觔一騰格準制錢五十五文值銀一兩初噶爾丹博碩克圖收降回
衆定額每年納錢二萬六千騰格此內有種地之鄂爾托什人等納糧
四萬八千九百八十八帕特瑪折錢四騰格一察喇克棉花折錢四十八文紅
十五察喇克一帕特瑪折錢四騰格一察喇克棉花折錢四十八文紅
花折錢三十二文共錢二萬一千餘騰格又克色克綽克巴什人等納
錢二萬六千騰格商人買收養人等納錢二萬騰格俱以本色折納又供
給疆屬喇嘛衣帽商人金銅稅園戶果稅邊界貿易回人徵稅十分之
一外來貿易之人徵二十分之一俱未能如數全完波羅泥都居住後
較前更少臣等推廣皇仁請將疆屬及零星雜稅盡行蠲免歲
徵糧四千帕特瑪棉花一千四百六十三察喇克紅花三百六十五察
喇克錢六千騰格俟將來駐兵與否酌交糧石銀兩金十兩葡萄一千
人照常納賦外其貿易稅課照舊辦理一大兵進剿應籌糧餉除歸降回
查各城鄉現種麥稔綠豆共籽種一千七百九十九石五斗有奇豐年
可獲七八倍荒年可二三倍但驚擾之餘應行酌減隨傳伯克等公議
今歲各城鄉共交糧二千帕特瑪準內地九千石其入官之地三倍交
納共一千二百帕特瑪準內地五千四百石七月起至歲底交錢一萬
三千餘騰格俱折收糧石舊果園七所歲徵葡萄俟歲底交納波
羅泥都新果園十五所除還強奪回人二所外其餘十三園所獲無多請
充官兵賞賚之用一回部錢文應行改鑄查回城錢文俱紅銅鼓鑄計

重二錢一面鑄準噶爾台吉之名一面鑄回字因所產銅少每鑄新錢
一萬騰格以新錢一文易舊錢二文銷毀更鑄又行換易今雖未便全
收改鑄現有鑄鐵銅七千餘觔請先鑄錢五十餘萬文換回舊錢另鑄
一二年間可以盡收或照內地制錢每一文重一錢二分或即照回錢
體質一面鑄乾隆通寶漢字一面鑄葉爾羌清文及回字謹呈樣請
旨一現在分路進兵追禽逆賊其喀什噶爾應酌量駐防擬派西
安滿兵三百名阿拉善兵一千五百餘名委散秩大臣伯永慶阿拉善公袞
楚克管理仍留綠旗兵一千五百餘名委提督閻相師酌量城鄉邊界
駐防臣一面前往葉爾羌查辦於閏六月二十五日起程其和闐阿克
蘇等處情形頗有不同已行文舒赫德辦理奏人得旨下部知
之二十六軍機大臣議回部設立阿奇木共三十一城計其大小酌
爲三等葉爾羌喀什噶爾阿奇木拜庫爾勒玉古爾牌租阿巴特塔什
關展爲四城中雅爾賽喇木拜庫爾勒玉古爾牌租阿巴特塔什
里克哈喇哈什阿克勒底雅喇木拜庫爾勒玉古爾牌租阿巴特塔什
爾號玉斯屯阿喇圖什英額齊盤巴爾楚克沙爾呼勒魯克察克托克
三喀喇和卓洋赫克勒品爲二十三小城俱給阿奇木伯克圖記其分
寸大城視內地佐置察贊協辦各一人其舊土城不成方圓周三里七
分餘東面二門西南面各一門二十七年察贊永公貴於舊城西北波
羅泥都之園塞爾們莊建鎮城高一丈四尺周二里五分門四東承恩

西撫羌南彰化北關遠三十年移叅贊于烏什改設辦事協辦各一人
三十六年定城名曰徠寧五十二年移還叅贊改辦事於烏什轄回莊
十六聖製詩駐烏魯木齊伊犁八旗兵陝西甘肅及烏魯木齊
綠旗兵伊犁錫伯索倫兵地暖多果木余假館叅贊衙齋軒窗兩面前
有歐蒲蘋婆後有葡萄蓮菱杏實尤碩大甘美烏蘭烏蘇河逕城南七
里又名七里河又東逕回城南卽所謂舊土城在鎮城東南里許據高
阜城已惡無樓櫓頽倪遙望斷墉破屋傾側東北隅有碎木楮梧故老
傳聞以爲我軍薄城爲礮所毀回人脩治尋復破壞城外隔渠有土阜
對其城缺損處謂是礮臺遺址按方略乾隆二十四年閏六月初三日
明公率前隊至伊克斯哈喇得獻城者十四日兆公至回人具鼓吹進
羊酒迎以入城豈有傳堞環城之事又按額敏和卓傳云夏進兵喀什

噶爾謀波羅泥都霍集占棄城遁額敏和卓以喀什噶爾麥甫熟遣子
茂薩馳入城收糧濟軍食大軍至兆公惠以茂薩理阿奇木伯克務可
知軍未臨城茂薩先已入之矣考額敏和卓傳云乾隆二十三年大軍討
霍集占抵葉爾羌額敏和卓聞之偕圖爾都及布魯特之胡什齊長納喇
巴圖以兵攻喀什噶爾襲英吉沙爾諸邑圖爾都傳亦云陰以布魯特
兵從額敏和卓攻喀什噶爾分賊勢益兵燹之迹是布魯特助順之師而
城外高阜或明公初至方埃兆公會此駐營遂生附會之說城內置三
品阿奇木伯克一人轄其屬瑪木特玉素布之遷喀什噶爾也土人龐
雅瑪獻所居地爲寺死卽葬焉墓在回城東北十里許乾隆二十五年
言喀什噶爾和卓木墓舊有三十帕特瑪地畝錢糧看守回人十二戶
今仍令管理以供祭祀修葺餘爲伊等養贍之資諭曰逆賊霍
集占等雖負恩肆惡自取誅戮至其先世君長一方尙無罪戾今回部
全定喀什噶爾所有從前舊和卓木等墳墓可派人看守禁止樵採汚

穢以昭國家
矜恤之仁

回人卽墓爲祠堂曰瑪咱爾周發石欄中列木格標馬牛

尾鹿角於其端謂薦牲祈福也樹木陰翳臺宇軒敞外垣以藍色琉璃

鏤刻花卉每日寅未申酉戌五時誦經呪日人則鼓吹送之曰送日鼓

七日爲市曰巴咱爾市前一日男婦入祠堂膜拜以求利市門外刻石

柱紀年一年一畫以派噶木巴爾初生爲元年派噶木巴爾於四月初

十日成道生六十三歲而卒嘉慶二十四年六月初二日爲彼中第一

千二百三十三年之終按回回術有太陽年彼中謂之宮分有太陰年彼中謂之月分

齋期以太陰年爲准數至第十二月則齋齋滿日相慶爲正旦齊月卽

月二所謂月一日者又不在朔以見新月爲准歷十二月爲一歲有閏日

無閏月故歲首無定月大率每間二年遞早一月如元年在十月三年則在九月五年則在

八月今以初二日爲歲除是用太陰法見新月爲歲首也明史曰三百

月初三

五十四日爲一周周十二月月有閏日凡三十年閏日凡三十年閏日言太陰年

也准此論之計三十年應有一萬六百三十一日則一千二百三十三

年積四十三萬六千九百三十四日又十分日之一以回回歲實三百

六十五日一百二十八分之三十一約之得一千一百九十六年又一

百四日半弱從嘉慶二十四年六月初二日逆數之當託始於唐高祖

武德六年三月初三日也其字曰哈特凡二十八頭右行有史曰陀犁

克字書曰阿里卜醫書曰惕普奇塔普農書曰哩薩拉占候書曰魯斯

納默梵書曰庫魯安明史西域傳默德那國中有經三十本凡三千六百餘段其寫經用克什米爾

國紙余出遊回莊每見跨驢偕行據鞍授經者亦立學舍生徒十數人

爲行負牆跪書所業於版方尺許前列木格如馬櫪狀倚版其上讀竟

削之斯亦禮求諸野矣烏蘭烏蘇河逕回城南又分南引渠一東流經

赫色勒布伊莊北

在喀什噶爾城東南八十里

溉其田又東流溉牌租阿巴特莊而

止

在喀什噶爾城東百六十里

渠即噶岱默特濬也河水又東與雅瑞雅爾河會西

域記云大龍池東派一大流東北至佉沙國西界與徙多河合而東又云佉沙國舊名疏勒徙多河即中國河徙多者烏蘭烏蘇也雅瑞雅爾來自龍池與之會自此而東為蔥嶺北河故曰即中國河矣蔥嶺北河者水經注文以河徑蔥嶺中北道是名北河所謂北河自疏勒逕流南河之北也

又東至噶巴克阿克集與南河合

北河自回城東復東流左會圖舒克塔什水水發托庸山匯空阿提山

水察克瑪克山水為特們河

準語特們駝也河水深駝方能渡也

又東南流經圖舒克塔

什卡倫北為圖舒克塔什水東流至玉斯屯阿喇圖什莊北

在喀什噶爾城北五十

十里即巴哈阿喇圖什

有伊蘭烏瓦斯水自北來入之地通邊外和什克傳云大

兵由阿克蘇攻喀什噶爾和什克繪圖告曰喀什噶爾西由鄂坡勒

同語

鄂有所指而言坡勒謂清能鑿物也地有池水清可鑿故名

達霍罕敏珠爾嶺由玉斯屯阿喇圖什

達安集延額德格訥諸部是也伊蘭烏瓦斯水三源

水以卡倫得名

一自札雅

克則伊

在卡倫北二十餘里

一自蘇格特

在卡倫北十五里

一自圖古爾滿提

在卡倫北五十里

分南流至蘇克賽而會南流十里經伊蘭烏瓦斯卡倫東又東南與圖

舒克塔什水匯二水同東流經阿斯騰阿喇圖什莊西南

在喀什噶爾城東北七十

里即伊克阿喇圖什

是即托庸河也受水多故湍急矣水折而南經伯什克勒木

莊東又南流二十里至布胡奇

在喀什噶爾城正東三十餘里

入北河河水自布胡奇

東流百三十里逕牌租阿巴特莊北

莊距河六十里

波羅泥都之敗也掠喀什

噶爾人百五十戶西逃牌租阿巴特莊人十餘戶不從賊因拒守河流

至斯亦曰牌租阿巴特河乾隆二十五年察贊阿公里袞奏言六月初七日據駐防玉斯屯阿喇圖什城把總報稱回人搶掠牲隻圍困城堡又准提督董孟告稱商伯克邁喇木妄造阿睦爾撒納越庫庫訥克嶺已取阿克蘇之言希圖扇惑人心臣派兵查拏行至伯什克勒木附近賊眾千餘排列臣率官兵八百餘名力戰賊入城堅守復以鎗礮攻圍是夜四鼓闔城就降邁喇木於城北掘牆逃走追至牌租阿巴特河正在造筏欲渡哨探官兵及赫色勒布伊之阿奇木伯克等告稱邁喇木會同呢雅斯逃走隨追至薩林都尋蹤入布魯特至和羅木魯克拏獲邁喇木呢雅斯蓋自玉斯屯阿喇圖什南奔故欲渡此河也河水又東流百一十里至英阿瓦特莊北莊距河岸五十里出喀什噶爾境唐景龍二年突騎施酋長娑葛入寇五千騎出安西五千騎出撥換五千騎出焉耆

五千騎出疏勒郭元振在疏勒柵於河口不敢出疑即斯河也牌租阿

巴特河又東一百里至托克察哈爾地又東九十里至伊米什地又東

八十里至阿克察哈爾地又東八十里至沙瑚爾地其南岸伯斯罕沙

磧也元人謂沙磧為沙陀今蒙古語曰戈壁下皆質言沙磧又東九十里至瑪拉爾巴什莊北莊在

葉爾羌城東北六百里折而東南流七十里逕喀喇塔克軍臺北復折而東北六

十五里逕巴爾楚克軍臺北巴爾楚克西南距葉爾羌城七百四十里

地有回莊故時設卡倫嘉慶四年裁為回疆四達之達故兆公惠之進

兵葉爾羌也奏曰巴爾楚克為葉爾羌喀什噶爾要路也乾隆二十三

年叅贊舒公赫德定邊右副將軍富公德援黑水之圍於此會師焉河

水經臺北色仍濁寬僅二丈流不甚駛分數支南行瀦為澤水始清有

魚如鯉余征鞍經此俯可以鑿蘊藻交橫網得巨魚然夏時潌水盛漲

諸蕩泛溢居民恒有昏墊之虞自喀什噶爾城由軍臺道葉爾羌至此
凡千三百三十里沿河行僅六百八十餘里漢書西域傳云尉頭國西
至捐毒千三百一十四里徑道馬行二日殆其地矣河南岸徧生胡桐
行其間者枝葉交格諺曰樹窩河北岸間道通烏什兆公由阿克蘇定
喀什噶爾卽取道烏什也河水又東北流八十里逕庫庫車爾軍臺西
又七十里至衡阿喇克軍臺西故老相傳霍集占害副都統阿公敏道
于斯按方略乾隆二十二年定邊將軍成袞奏言詢問回人薩替阿克
薩噶言兩和卓本將副都統阿敏道一百餘人在庫車城看守有庫車
城伯克呼岱巴爾氏聞兩和卓木欲害官兵暗行通信阿敏道遂步行
脫出殺回人三十餘兩和卓木卽遣三百人追及阿敏道等盡行殺害
蓋自庫車追至衡阿喇克而戕之杜欽之言曰德莫大於有國子民罪

莫大於執殺使者僭義干誅其兩和卓木之謂矣其地兩岸叢薄泛濫
爲藪紆徐蕩漾泥滓清澄至衡阿喇克軍臺西赤水盡爲清流行程止
息散步暢懷驛舍之旁卽爲河曲鞞紋縹浪夕陽在波短樹離離水禽
翔下晚飯柁樓亂我心曲河水復東北流三十餘里逕察特西林莊西
在葉爾羌城東北
九百三十五里又二十餘里逕烏圖斯克滿軍臺西又東北流五十

里逕伊勒都軍臺西又東北行四十里出葉爾羌界入阿克蘇界葦蕩
連延凡百餘里又東北二十里水折而東又二十里出葦蕩至都齊特
軍臺之西南折而東南行車馬履橋以度橋水幽深游魚可數又東流
至噶巴克阿克集其地極四十四度二十五分西三十六度三十分河
源紀略云河水至巴爾楚克又八百里至噶巴克阿克集境與西南來
之葉爾羌河會葉爾羌河發源蔥嶺中南道故曰南河矣葉爾羌古莎

車境北河經其北水經注言北河經莎車國南診其地勢南當為北

一曰葉爾羌河

回語謂地曰葉爾謂寬廣曰羌明時為葉爾欽音轉為葉爾奇木水道提綱

訛作也勒七母今正為葉爾羌元世祖紀至元十一年春正月立于闐鴉爾看

兩城水驛十三沙州北陸驛二曷思麥里傳哲伯令曷思麥思持乃蠻

主曲出律首往徇其地若可失哈兒押兒牽幹端諸城皆望風降附鴉

爾看押兒牽即葉爾羌音之轉也一統志云葉爾羌其地屬回回康熙

三十五年八月國王阿布都里錫特青吉斯汗之裔為其國第十九世汗偕其妻子來朝

先是康熙二十一年阿布都里錫特為噶勒丹綽羅斯第十五世汗僧格之弟襲僧格位所

執拘留帳下至是噶勒丹為大兵所破阿布都里錫特脫身來歸丙辰

朝于太和殿九月遣官護送至哈密返其國至瑪罕木特時霍集占

主其地乾隆二十年霍集占自伊犁遁還以葉爾羌叛二十三年五月

霍集占拒大兵於庫車師燬而歸聞定邊將軍兆公惠自阿克蘇進以

步騎萬人嬰城守波羅泥都自喀什噶爾以騎三千步二千來會刈田

禾盡驅民入城近城東北五六里為大坎築高臺以守十月六日大軍

至兆公勒兵分為三令巴圖魯瑞綽爾圖厄魯特散秩大臣達什策楞

領游兵皆陣城東戰之日左右軍與游兵先奪其臺賊於東西門分出

四五百騎對陣立中軍前隊明公瑞左軍前隊鄂木布等十人率師進

賊三戰皆北北門又出騎來夾攻為右軍前隊由屯截殺不得逞自卯

至申賊敗入城偵者言賊牲畜輜重在城南英額齊盤山原音英伊什齊盤英伊什

回語下坡之謂齊盤帕爾西語謂牧羊者山坡之下多游牧處故名十三日兆公徙營轉城東攻其南賊

阻澤普勒善河南岸半濟橋圯賊左右角我師總兵高天喜副都統三

格前鋒領侍衛鄂實侍衛特通額死之師東北行至喀喇烏蘇南為營
守所謂黑水之圍也地曰通古思魯克亦曰洗泊明年正月舒公赫德
富公德自巴爾楚克至迎師還阿克蘇越六月富公既定和闐復取葉
爾羌閏六月二日霍集占棄城遁其舊伯克以城降七月兆公自喀什
噶爾來定之方略乾隆二十四年七月兆惠等奏言臣等行抵葉爾羌
查所屬二十七城村計三萬戶十萬餘口謹繪圖呈
覽其葉爾羌貢賦從前噶勒丹策凌時每年交納十萬騰格內計白
米二百六十一帕特瑪有奇米五千八百三十九帕特瑪棉花一千七
百十五察喇克紅花四百二十八察喇克共折錢二萬七千二百八十
騰格有奇各項匠役納錢五萬四千七百八十騰格有奇此外有金稅貿易緞布牲
林碾磨金銀稅共一萬七千九百騰格有奇此外有金稅貿易緞布牲
隻等稅喇嘛園葡萄園雖按則徵收而全完者少霍集占入城雖
止徵二萬四千騰格雜糧二千一百九十帕特瑪及折徵牛羊稅九百
騰格而額外科斂衣服牲隻不時擾累供應稍遲即行抄沒以致回人
日困臣等查辦之際有大小回人等跪呈亥年間霍集占圍城三月餘
及此次逃竄又行搶掠生計甚屬艱難等語臣等察看葉爾羌城村情
形與喀什噶爾不同現在本年七月起交雜糧一千四百帕特瑪各項
謀生人等交一萬二千騰格嗣後勉力耕作次年加增一倍外交黃金

四十兩葡萄一千筋至辛巳年再行定議餘照喀什噶爾之例其隨賊
逃竄人等地畝計籽種五百二十七帕特瑪除踐踏之處計已種者一
百九十帕特瑪請與房屋園林一併交收入官至葉爾羌之大伯克等
多為霍集占所殺或挾之同竄現在人等惟授為密喇布之托克托和
卓人尙奮勉餘俱平常霍什克伯克舊為葉爾羌等城阿奇木伊叔素
資璫亦久為商伯克臣等將霍什克伯克署理葉爾羌之阿奇木事務
素資璫辦理商伯克事務其境東接阿克蘇西北接英吉沙爾西至塞
勒庫勒莊北至庫爾塔里木莊河水自西南出其東故以名之

其河二源西源曰澤普勒善河

西源出喀楚特城南大山源處極四十一度五分西四十三度三十分
東北流二百餘里有齊齊克里克嶺水南流百二十里經塞勒庫勒莊
東來滙塞勒庫勒在葉爾羌城西八百里為外藩總會之區達外藩凡
三道自塞
勒庫勒南十四日程曰巴勒提又東南一日程至其屬邑日哈普倫哈
普倫南十六日程曰土伯特即藏地也巴勒提西南二十九日程曰克
什米爾地出研蠟紙又西南四十三日程曰痕都斯坦善鏤玉以上皆
各自為部不相屬自塞勒庫勒西五日程曰黑斯圖濟又西南三日程

日乾竺特歲貢金一兩五錢又西四日程曰博洛爾其地南即巴勒提
會貢劍斧七首乾竺特西北九日程曰拔達克山其汗素爾坦沙獻霍
集占首貢刀斧八駿又北五日程曰塔木干又北三日程曰差雅普又
西南三日程曰渾堵斯又西北三日程曰塔爾罕與噶斯呢為鄰自黑
斯圖濟至塔爾罕皆噶勒察種也博洛爾西二十日程曰愛烏罕亦曰
喀布爾乾隆二十七年其頭人愛哈默特沙攻痕都斯坦殺其汗阿里
雅木吉爾其子阿里雅科瓦爾逃竄愛哈默特沙立阿里雅木吉爾之
孫取扎納巴特城以伯克守之自居拉固爾城又統眾至固珠喇特攻
克什米爾執其頭人塞克專二十八年貢刀及四駿其屬邑曰拉虎爾
距葉爾羌六十二日程自塞勒庫勒北三日程曰滾又西北二日程曰
幹罕又西北二日程曰差特拉勒分二道北一日程曰羅善西一日程
日什克南乾隆中有與葉爾羌阿奇木伯克鄂對為仇肆凶暴名曰沙
關機者即什克南頭人也又西北二日程曰達爾瓦斯自滾以下亦噶
勒察種達爾瓦斯北為喀爾提錦部布魯特羅善北為霍罕霍罕城東
南距塞勒庫勒十日程其屬城曰瑪爾噶浪在東北一日程曰安集延
在東北三日程曰窩什在東南八日程曰納木干在西南二日程曰塔
什罕在西北四日程曰科拉魯在西北五日程曰霍占在西南五日程
其大伯克自稱曰汗居霍罕城其塔什罕城舊為舍氏和卓與摩羅沙
木什二人分治舍氏和卓漸強摩羅沙木什被其侵奪訴于霍罕額爾
德呢伯克乞師復還侵地舍氏和卓又會西哈薩克及霍濟雅特之不
色勒伯克攻殺摩羅沙木什二子額爾德呢遂攻塔什罕丕色勒來拔
哈薩克後得之終入霍罕霍罕與回部分界處有二嶺曰噶布蘭曰蘇

提布拉克額德格訥部布魯特居之嶺東為回部嶺西為霍罕霍罕西
十五日程曰布哈爾亦大國東南距塞勒庫勒三十二日程其屬城曰
鄂勒推帕在東七日程曰濟雜克在東三日程曰拜爾哈在東北種人
三日程曰噶斯呢在西南十日程曰坎達哈爾在西南二十日程
黃鬚繞頰如獅毛不同諸回置五品阿奇木伯克一人治之歲貢金二
十七兩七錢西源折而東南流有水經羌瑋山東來匯又東逕托里布
隆之南是曰托里布隆河托里布隆河東南流百餘里折而東北又折
而西北凡數百里逕密爾岱山之北密爾岱舊作闕勒自葉爾羌城南
七十里至波斯恰木又西南五十
里至汗亮格爾又西南百五十里至英額莊又西南三十里至齊山峻
盤山又西南五十里至阿子汗薩爾又西南六十里至密爾岱山
三十許里四時積雪谷深六十餘里山三成下成者麓上成者巔皆石
也中一成則瓊瑤面之彌望無際故曰玉山採者乘犛牛至其巔鑿之
墜而後取往往重千萬觔山與瑪爾瑚魯克山峯巒相屬玉色黝而質
堅聲清越以長乾隆二十七年八月葉爾羌辦事採進玉特磬料十一

片重千四百三十觔姑洗磬二林鍾磬三南呂磬三十月進玉特磬料

十四片重千五百九十觔太簇磬五夷則磬一大呂磬二是歲又進玉

特磬料十四片重九百五十五觔蕤賓磬三夷則磬二林鍾磬一重華宮

半度玉特磬料十片重八十觔太簇磬姑洗磬蕤賓磬夷則磬無射磬

各備用半度磬料三片重二十九觔六兩二十八分三月採進正項磬

料十八片備用磬料二十六片六月復進正項特磬料十一片黃鍾磬

皆採自密爾岱黃鍾磬六太簇磬二大呂磬一

山以準噶爾鋸截之會典磬大者為特磬乾隆二十六年以和闐玉琢

之股大小異制黃鍾之磬鼓長二尺一寸八分七釐廣七寸二分九釐

股長一尺四寸五分八釐廣一尺九寸三分三釐五毫厚七分二釐九毫大

呂之磬鼓長二尺四寸四分七釐八毫廣六寸八分二釐六毫股長一尺三

寸六分五釐二毫廣一尺二寸三分三釐九毫厚七分六釐八毫太簇之磬

鼓長一尺九寸四分四釐廣六寸四分八釐股長一尺二寸九分六釐

廣九寸七分二釐厚八分九毫夾鍾之磬鼓長一尺八寸二分四毫廣

六寸六釐八毫股長一尺二寸一分三釐六毫廣九寸一分二毫厚八

分六釐四毫姑洗之磬鼓長一尺七寸二分八釐廣五寸七分六釐股

長一尺一寸五分二釐廣八寸六分四釐厚九分一釐二絲仲呂之磬

鼓長一尺六寸一分七釐九毫廣五寸三分九釐三毫股長一尺七分

八釐六毫廣八寸八釐九毫五絲厚九分七釐二毫蕤賓之磬鼓長一

尺五寸三分六釐廣五寸一分二釐股長一尺二寸四分四釐廣七寸六分

八釐厚一寸二釐四毫林鍾之磬鼓長一尺四寸五分八釐廣四寸八

分六釐股長九寸七分二釐廣七寸二分九釐厚一寸六釐四毫夷則

之磬鼓長一尺三寸六分五釐三毫廣四寸五分五釐一毫股長九寸

一分二毫廣六寸八分二釐六毫五絲厚一寸七釐八毫七絲南呂之

磬鼓長一尺二寸九分六釐廣四寸三分二釐股長八寸六分四釐廣

六寸四分八釐厚一寸一分五釐二毫無射之磬鼓長一尺一寸五分

三釐五毫廣四寸四釐五毫股長八寸九釐廣六寸六釐七毫五絲厚

一寸二分一釐三毫六絲應鍾之磬鼓長一尺一寸五分二釐廣三寸

八分四釐股長七寸六分八釐廣五寸七分六釐厚一寸二分九釐六

毫磬各一虛用時惟設一磬與鐘同高宗純皇帝聖製銘曰

大小同制皆鼓長一尺九分三釐五毫廣三寸六分四釐五毫股長七寸二分九釐廣五寸四分六釐七毫五絲厚薄各不同倍夷則之磬厚六分六毫八絲倍應鍾之磬厚七分一釐九毫一絲黃鍾之磬厚七分八釐九毫大呂之磬厚七分六釐八毫太簇之磬厚八分九毫夾鍾之磬厚八分六釐四毫姑洗之磬厚九分一釐二絲仲呂之磬厚九分七釐二毫蕤賓之磬厚一寸二釐四毫林鍾之磬厚一寸六釐四毫夷則之磬厚一寸七釐八毫七絲南呂之磬厚一寸一分五釐二毫無射之磬厚一寸二分一釐三毫六絲應

四十九年葉爾羌辦事差主事協同內

廷司庫恭陳委領催七十三玉匠永福潤安詣山採正用玉冊五百片

玉寶五十方備用玉冊三百片玉寶三十方凡重四千七百五十二觔

五十五年內廷果房災火樂器葉爾羌辦事採進磬料正玉六十四塊

副玉八塊其瑪爾瑚魯克山所產青質黑暈若血沁然回民自裕勒阿

里克卡倫以裕勒阿里克山得名回語裕勒淨貌山下有清水渠故名卡倫在葉爾羌城西南二百七十里來城鬻之

因名其玉曰裕勒阿里克備彝器於宮懸發靈珍於滔土表瑞呈英故

不脛而走矣高斌傳曰斌孫樸乾隆四十一年往葉爾羌辦事距葉爾

羌城四百餘里有密爾岱山產玉久經封禁四十三年二月高樸奏言

回民往往私採防範維艱莫若以官為開採間年一次可杜懷竊營私

之弊如所請行九月阿奇木伯克色堤巴勒底以高樸勒派回民三千

餘採玉婪索金寶並串商盜賣首之烏什辦事永貴遂革高樸職鞫實

論斬如律自是設密爾岱卡倫禁採玉嘉慶四年弛禁廢卡倫凡葉爾

羌和闐產玉常貢外聽民販鬻其年有採進密爾岱山玉三百者青重

萬觔次者葱白重八千觔小者白重三千觔輦至哈喇沙爾以其勞人

罷之余經烏沙克塔勒軍臺回語烏沙克小也塔勒柳樹也軍臺在哈喇沙爾城東北二百二十里土人

導余至驛舍東北觀之半沒塵壤出地者高二尺許托里布隆河又折

而東北流逕英額齊盤山北為澤普勒善河又東北流百數十里逕和

什阿喇布莊北

回語和什雙岐之謂阿喇布帕爾西語水也莊在葉爾羌城西南二百六十里

是為採玉第六

營

南岸

又東北流四十里逕喀崇莊南是為第五營又東北流六十里

逕阿爾瑪斯莊南有密爾岱泉水自南來會是為第四營

二營在北岸

又東

北流五十里逕塔爾哈奇莊北是為第三營又東北流三十里逕烏魯

克明莊北是為第二營又東北流三十里逕烏魯克圖必莊北是為第

一營

三營在南岸

又東北七十里逕葉爾羌城南河水屆秋澄清見底協辦

率主事一人筆帖式侍衛各二人詣河干祭以少牢衆伯克以回夫五

百人來會十夫一温巴什領之執旗於岸役夫杖策泝流以採比暮伯

克斂所得玉於辦事營帳差其輕重在二兩下者不入數三日一移營

復令二筆帖式率四品商伯克一人六品伯克四人回夫二百人入喀

崇山谷採足額

葉爾羌每年採貢玉一萬八千五六百觔

乃告謝河伯宴伯克獎夫役之勞

者還納玉於糧餉局俟和闐玉至同入貢乾隆四十二年高樸疏言葉

爾羌大河來自產磬片之闐勒山順流而下至揚瓦里克為洗泊過渡

之所渡口上流三十里即採玉之處葉爾羌河向不產玉自平定回疆

以後漸生玉石經前任大臣奏明揀採然每年可貢者不過數十塊質

尚遜于和闐續經前任大臣採獲白玉三塊於乾隆四十年十二月致

祭河神近年得玉頗有似和闐者而水勢安瀾分支灌溉村田並糧艘

挽運過行均屬有益澤普勒善河又東北流渟為洗泊

在葉爾羌城東南七十里

水草之交盧奴所緒是為黑水故回人稱曰喀喇烏蘇兆公之被圍也賊

決喀喇烏蘇灌營賴有壕得洩傍水有林木賊施銃銃著木我師取其

鉛丸以濟軍三閱月圍解余往尋遺蹤玉河清泚岸沙如銀隨波颿儵

沿溪豐草渡河而南四月沙棗作花香中行二十里至洗泊旁建顯佑

寺北為后土祠祠中一枯樹合十數人抱枝柯朽禿磚石甃之即曾受鉛丸者河水又東北流至揚瓦里克莊逕龍神祠南在葉爾羌城東南五十里祠為乾隆四十二年建又東北流百數十里至莫克里特莊西在葉爾羌城東二百里與東源會莫克里特亦曰邁格特也

東源曰聽雜阿布河

東源出庫克雅爾山

同語庫克青色山色青下臨坎故名

在和闐西與其南山屬水自山

出北流有一水自西來匯東源又北流二百餘里至沙圖城北

同語沙圖梯也

分為二行百八十里復合東行百里為聽雜阿布河

帕爾西語聽雜平緩之意阿布水也

言河流平緩也

亦曰哈喇斯坦河唐書于闐西五十里有韋關又西經渤

當作

海西北渡繁館河或即聽雜阿布歟源處極四十度三十分西三十九度五十分聽雜阿布河又東北流逕裕勒阿里克卡倫東乾隆二十四

年閏六月副將軍富德奏復葉爾羌言臣行至聽雜阿布河岸據鄂博什等將檄傳之喀瑪勒和卓送到軍營稱自將軍檄到合城老幼無不踴躍鳴金擊鼓三晝夜共相慶賀閏六月十八日黎明我兵整飭旗纛按隊渡河入自南門觀者塞道爭獻果餌富公來自和闐故渡聽雜阿布也河水又東北流逕哈爾噶里克莊南同語地多林木羣鴉所巢故名為哈爾噶里克河又東北為沁達勒河富公之赴援也奏言正月初六日至呼拉瑪同語石集居民之謂舊作呼爾瑪皆戈壁在葉爾羌城東霍集占領騎賊五千餘迎戰臣等從已至申與賊相持合戰十餘次賊始敗潰追奔十五里我兵多步行馬僅存百餘不能馳驟是晚收兵覓水安營次晨領兵前進途遇戈壁賊又踞高阜迎戰相持一晝夜初八日賊四面進攻官兵奮勇迎敵賊恃眾拒守臣等與官兵因駐兵沙磧兩晝夜無水吞噬冰塊人馬俱乏是夜布

列方陣覓有水之地安營一面通信阿里袞及我兵起行賊復來挑戰天曉至沁達勒河賊又奪我渡口卽整兵嚴守相持一晝夜選可用之馬五十餘匹給與精壯兵丁乘騎又派健步兵二百名往襲賊營初九日夜月落後行至卡倫適臣阿里袞選送駝馬與襲賊兵會臣阿里袞鄂博什分兩翼奮呼衝突初十日黎明領兵回營聞擊敗賊人尙有吹角招集逃衆者臣努三鄂博什等領兵居右臣阿里袞愛隆阿居左臣富德居中殺賊數百人適兆惠營中聞臣等鎗礮聲知援兵已集遣人齎文知會臣等乘賊敗潰整兵往援十二日哨探人稱賊人卡倫火光甚大不能前進臣等於十三日整兵二鼓起程五鼓至葉爾羌河岸偵探兆惠軍營相距二十里望見賊營烟火卽行駐兵十四日黎明前進約行六七里左翼遇賊直前攻擊賊不接戰入賊人右隊去時我右翼

兵以鎗礮接戰敗賊數次餘賊仍依蘆葦放鎗左翼兵急進賊遂渡河

逃臣等一面追賊渡河

皆渡聽雜阿布河

一面令努三等迎接將軍兆惠蓋洗

泊在兩河間援兵自東來沁達勒渡口爲賊所扼故復泝流而南濟自聽雜阿布也沁達勒河又東北至莫克里特莊會西源

過葉爾羌城東而合是爲蔥嶺南河

葉爾羌城置辦事協辦各一人轄回莊六十一

聖製詩注作三十九

駐巴里

坤古城吐魯番八旗兵二百六人陝西甘肅綠旗兵六百八十人城高二丈三尺周二千一百四十二丈三品阿奇木伯克一人轄其屬鎮城在回城中西南隅乾隆二十六年辦事新柱奏言葉爾羌辦事公署地面寬濶可添建房舍請於附近山林伐木造筏由河水順流放至城下以備物料從之今解署卽霍集占所居池臺開廣古木千章船步山橋

勾闌甚飭征車稅止八日遲遲徵酒尋詩景在心目城舊西門特堙塞之以昔納公穆扎爾遇難支解於門闔也納公與三公泰時自京來代將軍叅贊十月十四日將渡河詣兆公營賊三千攻之納公矢盡三公墜馬皆為賊所得死是為雙義乾隆二十四年於城東北五里建房祀曰顯忠祠立雙義碑城內東南隅有古浮圖一高三十餘丈回人名曰圖特謂是喀喇和台國人所造惟以軼焚不施櫺檻城之南有古墓松柏數十株石羊駝馬又石人二執笏佩劍言是喀喇和台國人之墓欲剗之則風雨作彼土謂漢人為和台也

又東與北河合

蔥嶺南河自始會折而西北行至愛濟特呼軍臺東北六十里臺距葉爾羌城又折而東北流六十里逕賴里克軍臺南又東北九十里逕邁那

特軍臺南又東北百里逕阿朗格爾軍臺南又東北八十里逕阿克薩克瑪喇爾軍臺南其軍臺有倉諺曰倉臺乾隆二十七年葉爾羌辦事新柱奏言自愛濟特呼至阿克蘇共設十四臺官兵口糧馬牛芻豆設倉於第五臺令索倫佐領蒙庫圖爾督率兵丁將葉爾羌河所造運船四隻轉運貯倉四十二年葉爾羌辦事又疏言距葉爾羌城五十餘里地名揚瓦里克玉河至此葉爾羌河統名玉河水寬溜平請造糧船六隻每年運糧至阿克薩克瑪喇爾軍臺貯倉然水多沙易淤船運尋罷玉河兩岸皆胡桐夾道數百里無慮億萬計說胡桐形狀見余漢書西域傳補注回人操奇贏者收其瀝淚聚於斯臺逆旅之間傾囊求售率為常焉南河自臺南折而東北七十里逕畢薩克底舊軍臺南又東北七十里逕塞爾古努斯舊軍臺南又東北八十里逕哲克得里克托海回語哲克得沙棗也里克有托海水灣也言水灣有沙

也棗舊軍臺南嘉慶五年河水盛漲阻遏行李北移軍臺改設沙磧復於阿克薩克瑪喇爾軍臺東濬一渠引河水渠東流九十里經闢展里克軍臺南回語闢展謂草積也又東折而北七十五里經海南木橋軍臺南又東流七十里經喀喇塔克軍臺南又東數十里而止海南木橋軍臺之西復引分渠一由臺北溉瑪拉爾巴什莊第渠水有時羸縮春夏之初濟不濡軌議者以為瑪拉爾巴什莊北數里即烏蘭烏蘇所經若開新渠以達於莊迭相灌輸有事半功倍之利南河又東流逕巴爾楚克軍臺南臺南為沙山山外為河河之南岸即沙磧乾隆二十三年舒公率兵先赴援奏言十二月十八日臣至巴爾楚克查兆惠進兵之路水草原屬平常又經踐踏及賊人燒燬臣等詢問嚮導於二十日渡葉爾羌河二十一日至額爾吉斯距軍營約八九日程蓋舒公即於巴爾楚克之南

濟河富公亦由此繼進也南河又東流逕衡阿喇克軍臺南軍臺傍烏蘭烏蘇東北趨而南河正東下故相去益遠舒公之至巴爾楚克奏言巴爾楚克岐途錯出此外若安設臺站恐被賊搶奪因於相去九十里今實百五十里之衡阿喇克以五十人設一臺有軍營要事不過五六日可至此設臺之始南河又東會北河河源紀略云西源與聽雜阿布河合東北流四百餘里至瑪咱爾塔克境其南為戈壁又東行五百里至噶巴克阿克集與喀什噶爾河會

一曰和闐河

漢魏晉皆曰于闐唐西域記言匈奴謂之于遁諸胡謂之豁旦印度謂之屈丹俗謂之渙那梵書又謂之薩旦那譯言地乳也元史亦曰于闐又曰幹端暗伯傳嘗親迎於敦煌阻兵不得歸乃客居於于闐宗王阿

魯忽之所世祖遣薛徹干等使阿魯忽以通好阿魯忽留使者數年不遣暗伯悉以已馬駝厚贖之令逃去薛徹干等得脫歸具以白世祖世祖歎久之既而命元帥不花帖木兒征于闐暗伯乘間至行營見薛徹干於帳中薛徹干曰公之忠義已上聞矣不花帖木兒遂承制命暗伯權充樞密院客省使俄有旨護送暗伯妻子來京師按阿魯忽者察合台太子之孫合剌旭烈大王之子威遠王阿只吉之兄太祖之曾孫也阿魯忽稱于闐王則于闐者阿魯忽分地也紀傳屢言征幹端征阿魯忽耳阿魯忽亦作兀盧旦只兒傳至元十九年從諸王合班元帥忙古帶軍至幹端與叛王兀盧戰勝之拜延八都魯傳至元十六年兀渾察從大軍征幹端劉恩傳進兵幹端海都將玉論亦撤率兵萬人迎戰遊騎先至設伏以待大敗之世祖紀至元十六年九月以忽必來別速台

為都元帥將蒙古軍三千人河西軍一千人戍幹端城十七年九月也罕的斤進征幹端二十年三月遣阿塔海成曲先漢都魯迷失帥甘州新附軍往幹端二十三年正月立羅不怯台閣屬幹端等驛二十四年正月以鈔萬錠賑幹端貧民二十五年七月命幹端戍兵三百一十八屯田二十六年九月罷幹端宣慰司元帥府仁宗紀延祐六年三月幹端地有叛者入寇遣鎮西武靖王搠思班率兵討之是在元時屹然重鎮地有六城曰額里齊回語居民環城之謂曰哈喇哈什回語哈喇黑也謂往取玉曰克勒底雅回語意其來而未定之曰玉隴哈什回語玉隴往取曰克勒底雅詞舊對音作克里雅曰齊爾拉回語引水入境也舊對音作齊喇又作策勒作努喇曰塔克回語地在南山中故以山名之霍集占之叛誘以從亂乾隆二十三年兆公遣侍衛及回長鄂對降其人鄂對守之及黑水被圍賊黨鄂斯滿等分攻克勒底雅齊爾拉塔克據之明年三月

賊復取哈喇哈什博羅齊之役回語博羅席也齊織席之人悉復之四

月二十二日副將軍富公抵額里齊城六城之衆攜壺漿跪迎和闐乃

定方略載參贊舒赫德奏言據總兵丑達將和闐六城回人應輸賦稅

列款呈報臣等查核定議一六城所交糧舊例十分取一每年二千

帕特瑪因甫經撫定酌量暫收九百九十五帕特瑪準官石四千四百

七十七石五斗俟來年仍照舊例徵收其塔里雅沁地畝所出與個人

分半收取一所產玉石視現年採取所得交納一採金三百戶每年照

例交金六十兩一交騰格錢文六城生計未裕暫定為一萬二千騰格

俟三年後酌量加增以四千充官兵三百員名鹽菜之需以七千七百

分贍各城伯克及誨經支用餘三百流轉備用一貿易之伯德爾格等

十戶應交金十兩請俟商人通行後再行交納一六城官果園七處被

賊踐踏基址亦小請賞給各城伯克一和闐難得銅鉛向俱藉葉爾羌

等處錢文行用現在各取內地匠役在葉爾羌鼓

鑄俟鑄出時酌量撥解得其境最廣東至策爾

滿南至南山西接葉爾羌北接阿克蘇河水自南達其北故以名之

其河二源西源曰哈喇哈什河

額里齊城南五百八十里有察克瑪克曲底雪山所謂南山也漢書曰

于闐在南山下漢書特言南山以別蔥嶺文獻通考言于闐都蔥嶺北

東出金城與西域記謂之雪山西域記言縛喝國小王舍城從城西南

入大雪山六百餘里至梵衍那國在雪山中又東南行二百餘里

度大雪山蓋以和闐南山為雪山而僧格喀巴布山為大雪山水經

注謂之仇摩置山有谷一曰桑谷在東二地東北距額出

水分流其源處極四十一度二分西三十七度四十分出谷而會東北

流三百餘里逕敖札特卡倫東又東北流三十里逕待達克卡倫西阿

哈薩爾卡倫東二卡倫相距一里又北流分為二西支西北流七十里逕哈喇

哈什城西三十里阜窪勒軍臺東回語阜窪勒為消滅蓋詛咒之詞為阜窪勒河乾隆

二十四年三月三日夜賊取哈喇哈什城副都統瑚爾起策應初六日

賊始覺接戰官兵奮擊衆奔潰追過阜窪勒河卽此河矣回人名曰色勒克蘇言黃水也阜窪勒河復北流至哈拉三入沙磧東支東北流逕額里齊城西十八里又西北流七十里逕哈喇哈什城東又東北四十餘里逕瑪咱爾卡倫西又北流至額克里雅爾回語額克里不正也地形不正且臨坎故名與東源會

東源曰玉隴哈什河

玉隴哈什元史作玉龍傑赤太祖紀十六年皇子朮赤察合台窩濶台分攻玉龍傑赤等城是也其河亦二源西源出哈朗歸山東北距額里齊城二百八里東源出雪山源處極四十一度十分西三十七度二源既會東北流二百四十里逕畢自雅卡倫西伊里班奇卡倫東二卡倫相距十里又東北二十里逕札木達爾卡倫東又東北二十里逕阿薩爾卡倫東那哈拉齊

卡倫西分爲二東支東北流逕玉隴哈什村西北西距額里齊城十里今無城故曰村又

西北流五里逕紀雅卡倫西賽巴克卡倫東二卡倫相距五里又西北流二十

里逕圖什罕里克卡倫西而西支來會西支自分處東北流十五里逕

額里齊城東至賽巴克卡倫西伊干奇卡倫東二卡倫相距五里又西北流十

五里會東支同北流八十餘里逕瑪咱爾卡倫東卡倫南距額里齊城百二十里又北

流二百里至額克里雅爾與哈喇哈什河會後魏書云于闐城東二十

里有大水北流號樹枝水後周書作樹拔水北史作首拔河卽黃河也一名計式水城

西五十五里上五字衍文後周書北史皆作城西十五里亦有大水名達利水與樹枝水會

俱北流蓋樹枝卽東源達利爲西源矣河產玉諺曰玉河乾隆二十六

年著令東西兩河及哈朗歸山每歲春秋二次採玉四十八年增採桑

谷樹雅五十二年停春採嘉慶四年葉爾羌辦事疏言和闐採玉處五

惟玉隴哈什河產者良其餘哈喇哈什桑谷樹雅哈朗歸山四處應停
 報可每秋於玉隴哈什採十五日附葉爾羌玉以貢玉大者亦堪作磬
 材乾隆二十七年進重華宮半度特磬料二片黃鍾磬一重十四觔
夾鍾磬一重九觔八
 兩備用玉四塊重四十八觔六兩又特磬料七片重三百六十八觔無射
磬四南呂磬一按漢書西域傳言于闐多玉梁書西南夷傳有于闐玉河
二應鍾磬一是其名稱從來已久高居誨使于闐記云于闐河分為三東曰白玉河
 西曰綠玉河又西曰烏玉河張匡鄴行程記云白玉河在城東三十里
 綠玉河在城西二十里烏玉河在綠玉河西七里其源雖一而其玉隨
 地而變每歲七八月水退乃可取謂之撈玉據斯以言白者玉隴綠者
 哈喇烏者為阜霍勒惟今之阜霍勒未聞出玉差為異矣元世祖紀至
 元十一年正月免于闐采玉工差役

過和闐城東西至城北而合是為于闐河

城即額里齊城也高丈九尺周三里三分門四三品阿奇木伯克一人
 治之鎮城在其中東南隅闢東門一辦事協辦各一人治之隸葉爾羌
 駐陝西甘肅綠旗兵二百二十三人轄回莊十一聖製詩
注作三十二極四
 十一度西三十六度五十五分哈喇哈什城在其西北七十里極四十
 一度十五分西三十七度十分

又東北與蔥嶺河合

哈喇哈什河玉隴哈什河各東北流二百餘里而合又東北逕卡塔里
 齊山之東又東北逕塔克三克爾之東又東北逕巴什博克邑之東地
 皆沙磧也合流凡四百餘里又東北與西來之喀什噶爾河葉爾羌河
 會漢書曰河有二源一出蔥嶺一出于闐于闐在南山下其河北流與

蔥嶺河合以古證今同條共貫矣

西域水道記卷二

羅布淖爾所受水下

三源既合阿克蘇河從北來注之

阿克蘇近漢溫宿國地乾隆二十三年參贊雅爾哈善奏言八月二十日阿克蘇頭目摩羅等遣圖拉克呈降文並言霍集占從庫車逃往阿克蘇時將拜城回人移往和闐烏什復集葉爾羌回衆三千五百阿克蘇烏什之衆一千起程再援庫車望見大兵行塵仍回阿克蘇欲將阿克蘇人亦移往烏什人皆閉城不從霍集占攻之城拒守霍集占乃往烏什等語臣給印文撫慰八月二十五日定邊將軍兆惠至領兵巡察入其城其境東接庫車西接烏什南接葉爾羌北接伊犁河水自其西北達其東南故以名之阿克蘇城西二百四十里爲烏什城兆公之

西域水道記卷二
入阿克蘇城也。霍集斯以烏什降，置辦事一人治之。烏什西北有蔥嶺支山，曰喀克善山。阿克蘇河西支發焉，源處極四十度五十分西，四十四度五十分西。支南流百里至額爾濟巴什嶺，北一水自北來入之。同東流經胡什齊部布魯特界，又經畢底爾卡倫南。在烏什城西九十里，一作博得爾。是爲畢底爾河。又東有小石山高聳，曰瑚什山。賴黑木圖拉之亂，賊據此峯以拒官軍。畢底爾河經其北，分二支並東流，經鷹落山北，又東經烏什城北。城爲乾隆三十年重建，素誠傳曰：乾隆二十七年，素誠赴烏什辦事，誠父子及辦事筆帖式姦宿回婦伯克妻阿奇木伯克阿卜都拉恣妄爲回人側目。至三十年閏二月，派回人運送沙棗樹，誠令其子回京而役回衆負行李。小伯克賴黑木圖拉之妻曾爲素誠所淫，積怨煽回衆作亂，夜焚劫倉庫，誠與阿卜都拉登城拒守，見賊勢衆，素誠自戕其

後阿公桂與伊犁將軍明公瑞討平之，盡誅逆黨，徙喀什噶爾英吉沙爾、阿克蘇諸城回民居焉。置五品阿奇木伯克一人轄其屬，重立鎮城，周四百六十八丈，有奇，高丈七尺。移喀什噶爾參贊駐之名城曰永寧門，四城據山之東南面，其山孤立，四面距衆山皆七八里。阿文成公年譜載公奏烏什之亂云：賊運糧於城內，默爾徹爾山是其名矣。山勢險峻，回語謂山石突出爲烏赤烏什，卽烏赤也。五十二年仍改置辦事一人駐巴里坤古城，吐魯番八旗兵百四十人，陝西甘肅綠旗兵百八十五人。嘉慶二十一年撥出六十名移駐阿克蘇。屯田兵二百五十人。城西南至城東有屯田三日，寶興曰：充裕曰豐盈，凡五千畝，皆引畢底爾河溉之。三十年之役，阿公桂奏賊投所積糧食於東門水磨，又奏言焚西北門外所有水磨，棄其麥麩，蓋西北東三面近水，據水爲碓也。河距城半里許，南岸林木

蔚鬱如列屏幃圍賴黑木圖拉時大軍列營河北城蔽於樹礮攻不入
自閏二月至八月孤城不下忽一夕賊盡伐木石郭金城豁然呈露中
秋之日一鼓殲焉河經城北至城東八十里而匯兩河間回人居之烏
什之未復也明公瑞奏言五月十九日有馬上賊人兩隊前來我兵接
戰卽退又有步下賊人五百餘驅牛羊千餘在兩河之間牧放并刈取
枯草今有礮臺遺跡河之北岸二百里爲大山自西而東繇亘不絕直
畢底爾卡倫北曰海奇山又東曰色勒克塔什山又東曰奇什罕布拉
克山蒙古語回語謂泉曰布拉克又東曰英阿喇特山又東曰蒙科素山又東曰科
克巴什山又東曰伊底克山又東曰臻丹山又東曰烏爾蓋列克山又
東曰木資魯克山又東曰烏玉布拉克山又東曰烏魯呼雅依拉克山
又東曰哈沙拉伊山與阿克蘇界統名曰貢古魯克山皆喀克善支峯

也貢古魯克山嵐嶂層複巖岫峻險山間溪澗縱橫谷中尤隘凡百餘

里劣容單騎有地曰南北郭羅南郭羅通伊犁之伊克哈布哈克卡倫

北郭羅則布魯特所游牧畢底爾河又東南流十餘里至提吐薩拉堤

莊北西至烏什城九十里出烏什境入阿克蘇境是爲托什干河回語謂兔爲托什干河濱多兔

故往來者津逮於斯設二舟焉托什干河東南流四十里經帖列巴克

莊南回部輔國公色提巴勒底者係烏什人舊居此莊有園尚存諺稱此莊曰色公園又東流至察哈喇克軍

臺東軍臺東距阿克蘇八十里哲爾格哲克得之地回語哲爾格林立之謂言沙棗樹成林也與東支匯

霍集斯傳云定邊將軍兆惠抵阿克蘇偵霍集斯及子漠咱帕爾居烏

什馳檄招降軍繼進抵哲爾格哲克得霍集斯遣次子呼岱巴爾氏獻

書降翌日抵烏什霍集斯迎謁卽東西支交匯處也東支發楚克達爾

山爲瑚瑪喇克河南流八里有湯那哈克河自阿克蘇城北六泉並

發同南流來匯由阿克蘇西行者亂茲二流以渡瑚瑪喇克河具舟四
湯那哈克河具舟二皆官給廩瑚瑪喇克河復東流至阿克蘇城西南
而與西支匯源處極四十一度三十分西三十九度阿克蘇舊屬烏什
嘉慶二年分爲專城城北至北山南至哈喇塔勒莊東南至赫色勒軍
臺東在庫車西北廣七百五十餘里輪二百餘里立岸如削高出地十
許丈其上平衍阿克蘇回城據其麓鎮城在其西北數十步地勢益下
同於釜底山泉泛溢陡若建瓴嘉慶十六年四月乙亥至五月朔己卯
雨不止庚辰山水大至繞回城入自鎮城東門阿克蘇城偏其東門實
在東南南門在西南西
門在城西北陷伊犁將軍晉公昌喀什噶爾參贊鐵公保重修治之城
周一百四丈高丈二尺門三鎮城回城間築堤洩水注於城南回語謂
白爲阿克言其地有白水故名其城也城南有稻田百五十畝乾隆二

十七年所開歲收稻米五百二石三斗五升置辦事一人轄回莊二十

二聖製詩駐烏魯木齊八旗兵六十人陝西甘肅綠旗兵六百

九十八人回城置三品阿奇木伯克一人轄其衆八千四百二十四戶

地產銅設廠二上銅廠曰雅哈阿里克廠回語雅哈邊界也地
臨邊界有渠水故名銅產其

西南六十里楚午哈山俗曰滴
水崖亦曰察爾齊克廠下銅廠曰温巴什廠

回語十日温頭曰巴什謂十人之長銅產其南四十里鹽池溝山亦曰鄂依斯塔克齊克

廠置遊擊一人司之立錢局焉回語錢曰雅爾瑪克一錢爲普爾直銀
一分初以五十普爾爲一騰格後定百

普爾爲一騰格直銀一兩謂一日必爾二日伊奇三日裕赤四日托爾

托五日伯什六日阿勒題七日葉題八日薩奇資九日托古斯十日温

百曰玉資千曰明萬曰圖瑞舊回普爾小於制錢厚而無孔一面帕爾

西字鑄葉爾羌地名一面厄魯特之托特字鑄準噶爾台吉名乾隆二

十五年九月葉爾羌開局收回普爾改鑄制錢面文曰乾隆通寶用漢

字幕文曰葉爾奇木左國書右回字重二錢以一制錢當二普爾嗣改

幕文曰葉爾羌供喀什噶爾葉爾羌和闐三城用三十三年回普爾收

盡停葉爾羌局阿克蘇局平定初參贊舒赫德立之賦回人銅鑄以供

阿克蘇烏什庫車哈喇沙爾賽喇木拜六城用重同葉爾羌三十一年
 尚書永貴移局於烏什三十五年定制重一錢五分幕文曰烏什嘉慶
 三年參贊長麟復移局於阿克蘇定制重一錢二分幕文曰阿克蘇五
 年定制歲鑄乾隆通寶錢二成嘉慶通寶錢八成凡額銅歲鑄錢二千
 六百餘千文餘銅歲鑄錢一百二十千文統名曰普爾一當制錢五
 回城通用至吐魯番托克三軍臺止莊在阿克蘇城南百東西支匯東流六
 十里復分為東西二支西支南流經艾柯爾莊東莊在阿克蘇城南百
 為艾柯爾河艾柯爾莊者郡王霍集斯故里也霍集斯於乾隆二十五
 年三月移居京師留其幼子托克托索丕守墳墓今猶聚族居焉艾柯
 爾河又南流至渾巴什軍臺西南三十里軍臺距阿克蘇城八十里折而東南流經
 伯什阿里克莊南莊距阿克蘇城百六十里復東南流而與東支匯凡行二百里東
 支東南流經阿克蘇城南距城四十餘里又東南流經渾巴什軍臺東三十餘
 里是為渾巴什河水寬里許有渡船二余旋程五月河流未盛已有浩
 淼之思矣元史耶律希亮傳中統四年至可失哈里城四月阿里不哥

兵復至希亮又從征至渾八升城按渾八升城即今渾巴什莊矣渾巴

什河東南流經渾巴什莊北是為楚克達爾河又東南流經伯什阿里

克莊北又東南流至哈喇塔勒莊南莊在阿克蘇城東南二百里而與西支匯是為

哈喇塔勒河亦行二百里哈喇塔勒莊在扎木軍臺南蒙古語扎木道

阿克蘇城東八十里地當孔道故名與和闐界昔富公德援和闐經行沙磧置臺站六於

斯今車騎不通河流又萃豐草長林是多禽獸哈喇塔勒河南流至噶

巴克阿克集北境與蔥嶺于闐河會會處極四十度十五分西三十六

度四十分凡茲四河蔥嶺二源最長喀什噶爾河二千七百餘里葉爾

羌河二千一百餘里和闐河長一千一百里阿克蘇河長九百餘里交

流奔赴進以東行河源紀略云會處四水交貫形如井欄水經注云北

河逕温宿國南於此枝河右入北河枝河即阿克蘇河也水經注又云

北河又東逕姑墨國南姑墨川水注之水導姑墨西北赤沙山東南流逕姑墨國西姑墨川水唐之撥換河今之阿爾巴特河亦曰阿察哈喇河阿察回語分支岐出之謂河有分支望之色黑也出阿克蘇城北瑪咱爾溝山中東南流經和約伙羅克軍臺南軍臺在阿克蘇城東北二百四十五里繞鹽山東鹽山者自麓至巔赤土壁立草木不生土中產冰鹽小者如拳大者如盤光明似水晶已目疾口病故山有赤沙之號漢時烏孫治赤谷城疑在此山中也水經山之東而南流經哈喇裕勒袞軍臺西回語裕勒袞謂垂柳柳陰深黑故名軍臺在阿克蘇城東一百六十里其地古姑墨國也又南入沙而伏長凡三百里不入北河與酈君時異哈喇裕勒袞之東百二十里為滴水崖皆沙磧唐書西域傳自龜茲踰小沙磧謂此也

又東克勒底雅河從南來注之

和闐額里齊城東十里為玉隴哈什村極三十六度五十二分西三十六度二十分玉隴哈什之東南二百三十里為齊爾拉村極三十六度四十七分西三十五度四十分齊爾拉之東北百八十里為克勒底雅城極三十六度五十八分西三十四度三十分塔克村在克勒底雅南度十三分西三十四度四十五分城據南山曰克勒底雅山有徑通藏地康熙五十八年六月四川總督年羹堯疏言近者西藏諸部落以貝勒達顏病故舊汗曰藏巴汗噶爾瑪丹炯旺博有和碩特之顧實汗滅之留主其地達顏即顧實汗長子嗣為汗人人有相吞併意聞策零敦多布現令左哨頭目春丕勒率兵六百餘過喀喇烏蘇河往青海又聞發兵八千來藏已至葉爾羌克勒底雅雍正元年六月青海羅布藏丹津顧實汗之孫達什巴圖爾之子襲和碩親王以叛削爵將由克勒底雅入藏松潘鎮總兵官周瑛選精騎三百貝勒康濟鼐西番語作康臣鼐索特納木佳勒博漢字從轉音稱康濟鼐初為阿

里噶爾本封貝子後辨噶卜倫事帶番兵萬餘由楊八景追至噶勒藏骨岔阻雪乃止

西藏志曰自衛藏招正北行二十四日至納克產又十五日至書隆沙

爾又十八日至克勒底雅城是也西藏志又云自阿里西北所屬之魯都克城十五日至葉爾羌蓋有兩路

可達克勒底雅在藏正北葉爾羌在藏西北也克勒底雅山千餘里淤沙積雪烟瘴逼人冬夏

不可行水發山中北流經克勒底雅城東唐西域記云瞿薩旦那城東

南百餘里有大河西北流國人利之以用溉田其後斷流王深怪異於

是命駕問羅漢僧曰大河之水國人取給今忽斷流其咎安在羅漢曰

龍所為耳宜速祠求當復昔利王因迴駕祠祭河龍忽有一女凌波而

至曰我夫早喪主命無從所以河水絕流農人失利王於國內選一貴

臣配我為夫水流如昔王曰敬聞於是舉國僚庶鼓樂飲饌其臣乃衣

素服乘白馬與王辭訣敬謝國人驅馬入河履水不溺濟乎中流麾鞭

畫水水為中開自茲沒矣頃之白馬浮出負一旃檀大鼓封一函書河

水遂流至今利用即此河矣唐書云于闐東三百里有建德力河河東

有建德力城亦曰拘彌城即寧彌故城今河在城東城郭遷移不足為

異河北流三百里入大河

又東過布古斯孔郭爾郭境北為額爾勾河

回語孔郭爾郭野果名布古斯謂腹借以喻果實之大也地在額里齊

城東北五百餘里距噶巴克阿克集近百里極四十度二十五分西三

十六度二十分午正日景夏至長三尺一分冬至長二丈二寸六分春

秋分長八尺四寸七分其境南皆沙磧中有大山縣巨沙圖嶺支峯

也沙圖見上沙圖圖者狀其層出大河逕其北為額爾勾河準語謂河流迴抱為額爾

勾也唐書地理志云姑墨州南臨思渾河是其異名矣布古斯孔郭爾

郭東二百五十里至葉伊勒干

回語葉伊勒開展之義于謂平也言其地寬平

又東八十里至

葉勒阿里克

回語葉勒風也地有水渠流急如風

又東北七十里至沙雅爾城

回語沙部長之謂雅

爾軫郵之詞舊有伯克軫郵其部也

又東過沙雅爾城南

沙雅爾者庫車屬城也

帕爾西語庫謂此地車謂智井地舊有智井也

庫車為漢龜茲國北境

元史西北地附錄作庫徹霍集占之倡亂也大軍征之自庫車始乾隆

二十三年五月入庫車境六月十六日薄其城靖逆將軍雅爾哈善遣

領隊大臣愛隆阿攻其南副都統順德訥戰其西皆敗賊追至鄂根河

霍集占以兵三千渡河來援左肩中矢陣獲其蠹霍集占自西門入城

守二十三日夜半復以四百人出西門渡鄂根河去八月五日城中賊

亦遁舊伯克阿集等以庫車城降沙雅爾伯克瑪哈默第亦遣子阿三

和卓獻城庫車城周四里六分六釐門四沙雅爾城周二里許高丈四

尺南北門二明年西域平於庫車置辦事一人駐陝西甘肅綠旗兵三

百二名兩城相去百八十里

沙雅爾城在庫車城正南

中以亮格爾為界

回語謂憩息之所曰

亮格爾北距庫車城百

里南距渭于河七十里亮格爾以南沙雅爾伯克主之以北庫車伯克

主之沙雅爾額徵糧八百七十二石六斗紅銅三百五十八觔十兩五

錢火藥三百觔硫磺一百觔硝一百觔城所在極四十度五十五分西

三十四度十五分午正日景夏至長三尺一寸七分冬至長二丈一尺

二分春秋分長八尺七寸二分其境東至斯爾里克墨洗提三百二十

五里

地有禮拜寺已毀

東南至耶哈里三百里城西六十餘里為賽拉里克卡

倫卡倫西三百二十里地曰塔什根柯里卡倫西南二百四十里地曰

巴什克雅克皆與阿克蘇哈喇塔勒莊通為達喀什噶爾葉爾羌開道

自斯爾里克墨洗提由南迄於塔什根柯里極目沮洳不通人跡額爾
勾河之北岸也城東北二百里曰烏魯庫木城西北二百四十里曰洋
塔克沙爾皆界庫車洋塔克沙爾有廢城與裕勒都斯巴克在庫車城西南九十里
餘毗連嘉慶十九年庫車辦事伍爾德尼疏言裕勒都斯巴克在渭于
河西岸濬渠引水達其莊以墾種報可掘地獲舊銅甄三二有天下太
平字特貯彼庫用彰厥瑞額爾勾河運城南百餘里卽魏書所云龜茲
國南三百里有大河東流號計戍水者也唐書作計舒突騎施酋長娑
葛之犯塞也闕啜忠節送唐御史中丞馮嘉賓於計舒河口龜茲國都
在白山南百七十里今白山南二百里至渭于河又南十里至沙雅爾
又南百餘里卽至額爾勾河計其道里當是河流北徙矣河之南岸爲
大磧磧中亂山糾紛其大嶂凡三沙圖圖嶺南北與哈喇沙爾城直中

隔千四百餘里嶺北趨四百餘里折而西北千二百餘里至布古斯孔

郭爾郭之南而止次東者礪什達爾烏蘭達布遜山回語礪砂曰礪什達爾鹽曰達布遜

山產礪砂紅鹽按明華夷譯語鹽曰荅不孫卽達布遜之異文南北與羅布淖爾直中隔千里其山

高峯崛起西北行二百餘里分二支南支西行二百餘里爲順托郭爾

山而止北支西北行千四百餘里轉西至沙雅爾之南陞而止又東者

錫津烏蘭山南北與吐魯番城直中隔千四百餘里錫津烏蘭山復東

北趨百餘里爲巴顏哈喇得里奔巴山準語巴顏富厚之意又東爲諾木齊圖山

蒙古語諾木謂佛經齊人衆也圖有也山下居民多奉黃教者爲巴顏哈喇西倫山爲陰得爾圖錫勒

圖山蒙古語陰得爾基之高者爲奇爾薩托羅海山蒙古語托羅漢首也凡六百餘里以屬於

巴顏哈喇嶺卽阿勒坦郭勒準語阿勒坦黃金也所自出也巴顏哈喇得里奔巴

山之西二百里分支西北行一千里至羅布淖爾南八十里而止支山

之東爲瑪海沙磧周二千餘里當哈喇淖爾之西又東北爲噶順蒙古語噶
順味之苦者沙磧又北爲伊爾瑚瑪沙磧當哈密城西南蓋和闐東北
言水味苦也大漠無垠辨機西域記云于闐東行入流沙沙礫流漫聚散隨流人行
無跡遂多迷路四遠茫茫莫知所指行四百餘里至覩貨羅故國國久
空曠城皆荒蕪從此東行六百餘里至折摩馱那故國卽沮末地也城
郭巋然人烟斷絕從此東行千餘里至納縛波故國卽樓蘭是知沙磧
計程二千里而遙漢渠勒精絕戎盧小宛諸國淹沒無蹤意淪入瀚海
如曷勞落迦城之比矣

又東爲塔里木河

河水汪洋東逝兩岸曠邈彌望菹澤商販經行所不能到旣逕沙雅爾
城又逕沙山南折而北地曰塔里木西北距沙雅爾城二百許里準語

回語謂可耕之地曰塔里木言濱河居人以畊爲業也河北岸置卡倫

築土爲臺高二丈許上設羶帳涼棚作瞭望所河逕卡倫東復折而東

趨水寬五十餘丈是河名所由來矣一作塔里木河又作特里木鐵里木皆音轉也

又東渭干河從北來注之

阿克蘇城北四百四十五里伊犁惠遠城南六百五十五里中有大山

曰木素爾嶺回語木素爾水也言爲冰結成按明華夷譯語水曰莫勒孫卽木素之轉音車登三丕勒傳附

凌巴勒傳乾隆二十年六月霍集斯禽獻達瓦齊偕副都統額爾登額以兵

五百由木素爾嶺往取械達瓦齊詣軍又曰造哈嶺乾隆二十三年兆

公惠奏搜捕厄魯特自巴爾呼特嶺過造哈嶺是也山脈來自西三百

里之薩瓦布齊山亦喀克善山支峯故唐書以爲蔥嶺北原嶺長百里

高百餘丈堅冰結成層巒疊嶽高下光瑩冰有三色一種淺綠一種白

如水晶一種白如碑礪嘉慶二十一年正月五日黎明自噶克察哈爾

海軍臺在伊犁沙圖阿行二十里至山麓朝日始升據鞍魚貫如緣螺

殼天風橫吹飛沙擊面寒砭肌骨噤不出聲冰每坼裂寬或近尺塞馬

骨作橋上嶺數里渡雪海周三四里一線危徑界海正中劣裁容馬若

逢巽二震怒騰六肆虜神鷹不飛冰嶺遇風雪迷道有一神鷹飛鳴隨其所向覓路乃得出迷途坐

困杜環經行記云見文獻通考從安西今庫車地唐置安西都護府西北千餘里有勃達

嶺又北行數日度雪海海在山中春夏常雨雪故曰雪海有細道道傍

往往有冰孔嵌空萬仞轉墮者莫知數即其地矣嶺中又有二池周各

十許丈在冰不冰淵然澄澈其熱海之儔歟杜環經行記云勃達嶺北行千餘里至碎葉川其川

東頭有熱海茲地寒而不凍故曰熱海嶺端夏日消釋汜濫四出冬復增高冰中時函馬

骨又含巨石如屋及其融時冰細若臂銜石於顛柱折則摧當者糜碎

辨機西域記云跋祿迦國西北行三百餘里度石磧至凌山詩納于凌

陰冰室也周官掌冰者曰凌人是知凌即冰說文作憐引詩納于憐陰此則蔥嶺北原水多東流矣山谷

積雪春夏含凍雖時消泮尋復結冰經途險阻寒風慘烈多暴龍難陵

犯行人由此路者不得赭衣持瓠大聲叫微有違犯災禍目覩暴風奮

發飛沙雨石遇者喪沒難以全生余按辨機之言斯為不虛惟衣赭持

瓠之忌今則不爾行五十里許展敬於回人瑪咱爾乾隆二十五年四月

赫德奏稱過木素爾嶺下至山麓有澗名塞塞克句愛噶爾雅勒其險

處約四十餘里一值風雪即難行走必須往候晴霽從前準噶爾於其

地樹旛誦經致祭今四月初旬遞送事件兵丁有凍斃者酌於附近之

克斯地方造屋以資避禦等語木素爾嶺為往來要路今山澗險阻猝

遇風雪人力難施蒙古風俗俱誦經致祭著傳諭舒赫德如回人乃下

內有善於禳禱者令其虔誠將事或無其人即遣厄魯特人致祭

冰梯梯寬二尺冰之消長無定梯亦因之增損乾隆二十五年五

月上諭舒赫德奏由木素爾嶺行走四十餘里地多冰石相雜

內有二里全係冰山滑不可行每日派人十名鑿鑿磴道等語木素

爾領係往來要路既係冰堅難鑿十人之力恐不敷用舒赫德應多派
同人前往專責以脩治道途冰雪之役行走人多地氣漸就和暖則凝
涸自易又四十餘里下嶺始盡乾隆二十五年秩於祀典春秋祭之

消融二十五日舒赫德奏言臣等於九月二十五日致祭木素爾嶺先
三日天氣清和本日風霧盡斂日色昭朗官兵回人等俱驚異歡悅臣
察勘木素爾嶺形勢由山陽之阿爾巴特阿瑞入口兩面俱是高峯中
口繞行冰石相雜之地二十里至塔木噶塔什軍臺即山嶺之足初入嶺
路回人一百二十戶內每日派二十人更番樵鑿過此地復冰石相雜
約六七十里至噶克察哈爾軍臺山陰積雪柴薪甚乏其祭文曰惟
神之功匹蔥嶺以稱尊洵回中之巨鎮臨于闔而作障允塞外之奧區朕
紹服丕基救寧方夏乘搜即敘遂率頡利之庭蒲海載清遠致防風之
骨踰二萬里而獻捷不四五年而成功惟茲百部屯田聿顯懷柔之應是
之域曩者六師奏凱式彰默祐之庥今茲百部屯田聿顯懷柔之應是
用登諸祀典載在秩宗練吉日以薦馨遣重臣而展告廢縣屢舉巍乎
列嶽鎮之班盼蠻丕昭歸然作塞垣之固介以繁祉休有烈光陳此苾
芬庶其款格嘉慶七年定制凡新疆祭山川文嶺下洪流噴薄厥聲殷
朕字皆敬謹改書高宗純皇帝尊號

雷色如米汁諺曰白龍口又西行里許為塔木噶塔什軍臺臺後山尤

險惡不通徑路巨臺之右於臺西五里許湧泉如墨諺曰黑龍口二水

交滙於軍臺南是為木素爾河乾隆二十一年定邊右副將軍兆公惠

奏言副都統阿敏道閏九月初五日帶兵將至庫車城探知阿克蘇城

之阿布塞塔爾率眾一千人住木素爾河即此河也是為渭干河西源

源處極四十二度二十分西三十六度二十分至五十分白龍黑龍兩

山並趨而南石壁渾成文緻旋轉絕無艸木猿狖善援所不能上兩山

相去數十丈水流其中滿谷浩汗行人跋涉終日橫瀟凡西南流八十

里經瑚斯圖托海軍臺東又南流五十里經圖巴喇特軍臺東乃折而

東南行百餘里經滴水崖沙磧北又數十里經諾依古特莊南莊在阿

東偏北三百五十里察爾齊克軍臺北是為木咱喇特河諾依古特者布魯特部

也乾隆二十三年布魯特噶岱察爾雜內附授牧地於斯今四品比邁

瑪第利其曾孫也轄布魯特人八十五戶莊在木咱喇特河北岸十餘

里木咱喇特河又東八十里經鄂依斯塔克齊克軍臺北又折而南數

里經雅爾幹莊莊在阿克蘇城東四百餘里是為雅爾幹河經莊折而東有哈布

薩朗河哈布薩朗回人名居於河濱故名自北來匯哈布薩朗河發拜城城在鄂依斯

臺東六十里西北山南流分三支西二支南流入雅爾幹河長八十里東支

流數里後又分為二西引者南流經拜城西匯西二支入雅爾幹河東

引者東南流匯哈喇烏蘇經拜城東為木札特河南入雅爾幹河哈喇

烏蘇者發拜城東北山在哈布薩朗河源東近百里南流十餘里分二

支西支西南流入哈布薩朗河東支東南行經賽喇木城東城在拜城東一百里

舊作賽里木回語賽喇木安適也拜富厚也二城皆阿克蘇屬城止不流雅爾幹河既匯木札特河東

流七十餘里經賽喇木城南有南湖水自西北來入之霍集占之援庫

車挾賽喇木眾百人行且將遷之阿克蘇眾弗從乃使逆黨阿里守之

既敗賽喇木人阿瓜斯伯凱等夜殺阿里以城降置游擊一人轄綠旗

兵又以三品阿奇木一人轄賽喇木回民一千四十九戶四品阿奇木

一人轄拜城回民五百九十三戶雅爾幹河又東二十餘里與赫色勒

河匯赫色勒者渭干河東源也源處極四十二度西三十四度三十分

至三十五度十分三支並發西支自阿勒坦呼蘇山準語呼蘇樺樹也言山多樺樹秋深

葉色如金呼蘇一作呼斯坦東支自額什克巴什山回語額什克小山羊也巴什謂頭言山形似之額什

克巴什者所謂白山也隋書曰阿羯山唐書曰阿羯田山定邊將軍兆

公惠之自協理庫車赴阿克蘇也奏言臣與雅爾哈善進兵夾攻行至

阿勒坦呼蘇嶺雪盛路險臣與官兵等牽馬步行兩晝夜足知其形勢矣

三水匯南行八十里作和坦爾山水自東北來沙爾達朗水自東來又

匯西南行七十餘里經赫色勒軍臺西為赫色勒河山勢蜿蜒庫車伊

犁喀喇沙爾三面銜界每歲季春設卡倫二季秋乃罷一曰呢咱爾阿

塔在赫色勒軍臺東北山內百三十里一曰阿爾通伙什在呢咱爾阿塔卡倫東北三十里皆在河源西

岸赫色勒河又南流三十餘里經千佛洞西緣山法像尚存金碧壁有

題字曰惠勤蓋僧名也河流經巖下雅爾幹河來匯是為渭干河其西

岸有古廢城周二里許兩河匯處極四十一度二十五分西三十五度

十分渭干河東流折而南凡四十餘里經丁谷山西山勢斗絕上有石

室五所高丈餘深二丈許就壁鑿佛相數十鋪瓔珞香花丹青斑駁洞

門西南向中有三石楹方徑尺隸書梵字鏤刻回環積久剝蝕惟辨建

中二年字又有一區是沙門題名首行曰沙門日二行曰惠親惠三行存一字若磨改者四行曰法兩

岸有故城水經注引釋氏西域記曰龜茲國北四十里山中有寺名雀

離大清淨

按洛陽伽藍記云乾陀羅城東南七里有雀離浮圖是國王伽尼色迦所作西域浮圖此為第一則龜茲此寺蓋以塔為名也高齊亦寫築此寺於華林園即劉桃枝拉殺趙郡王叡處

辨機記亦云屈支國城北四十餘里接

山阿隔一河水有二伽藍同名昭怛釐而東西隨稱佛像莊飾殆越人

工僧徒清肅誠為勤勵今溯遺蹤差存髣髴渭干河經洞前南流八里

至山外疏為五渠東引者二北曰脾租阿巴特渠東南溉其莊而止租稗

阿巴特莊在庫車城西四十里南曰渭干渠東南流經胡木土喇莊伯什克勒木莊亮

格爾莊北三莊在庫車城西迤北六十里又東南經伊帕爾巴克莊北庫車城西五十里又東

南經和土喇莊東庫車城西六十里喀喇蘇莊西庫車城西五十五里又東南經音奇克

愛里克莊北庫車城西迤南五十五里又東經特忒爾齊莊北庫車城西南七十里又東經羌

格莊北庫車城西迤南六十里又東經霍爾納斯莊北庫車城西南六十里又東經英格土

喇莊北庫車城西迤南五十里又東南經伯什巴克莊西庫車城西南三十里又東南經托古

斯托滿莊南庫車城南六十里又東南至亮格爾莊而止庫車城南百里西引渠三北

曰裕勒都斯巴克渠西南流溉其莊而止次南曰塔什里克渠南流溉

其莊而止塔什里克莊在庫車城西八十里又南曰托克蘇渠南流經札依莊西庫車城西

五里又西南經伊奇愛里克莊北庫車城西迤南八十里又南流至托克蘇莊而

止庫車城西渭干河南流經胡木上喇莊西又南流經札依莊東和卓

土拉斯莊西庫車城西六十里蓋唐之白馬渡也唐書地理志安西西出柘厥

關渡白馬河百八十里西入俱毗羅磧經苦井百二十里至俱毗羅城

又六十里至阿悉言城俱毗羅磧今之赫色勒沙磧俱毗羅城今賽喇

木城阿悉言城今拜城西域記云屈支國城西門外會場西北渡河至

阿奢理貳伽藍原注唐言奇特庭宇顯做佛像工飾僧徒肅穆精勤匪怠當亦

由斯渡矣渭干河又南經提根莊東庫車城西南百十里又折而東南行經喀喇

沙爾莊南庫車城西南八十里又東南經奇塔特莊南庫車城西南八十里乾隆二十四年

德文奏言准舒赫德咨稱沙雅爾河道通葉爾羌喀什噶爾可否造船

試運及堆貯糧石之處查沙雅爾距庫車百四十餘里今作百八十里中有衛

林河即渭干河之奇塔特地方可留貯糧石謂此莊也渭干河又東南經洋

得爾滿莊南庫車城西七十五里科科布勻莊北沙雅爾城西北四十里又東南經雅瑞

愛里克莊北沙雅爾城西二十五里又東南經葉格爾齊莊北沙雅爾城西二十里又東經

賽里克塔爾莊北沙雅爾城西十里又東南經沙雅爾城北章格爾愛里克莊

南沙雅爾城北十里是為鄂根河鄂對傳曰大軍抵庫車鄂對以世居悉形勝

告雅爾哈善曰庫車城西達沙雅爾有鄂根河水盛可行舟請兵備霍

集占果攜賊五千餘自鄂根河抵庫車為我軍所敗袁楚克傳曰附玉木楚

傳霍集占攜賊五千餘來援慶擊之賊黨跳走追至鄂根河蘇巴什山

陣斬三百餘級回人謂之烏恰特河同語烏指遠處而言恰特村莊也濱河舊有村莊河又東

南經喀喇墩莊南沙雅爾城東北五里又東南經察爾達克莊南沙雅爾城東北十里又東

南經朔爾塔木莊南沙雅爾城東北十五里塔什克塔木莊北沙雅爾城東南十五里又東

經楚爾和沙爾莊南沙雅爾城東北四十里克爾達什莊北沙雅爾城東南五十里又東經

克雅瑪塔莊北沙雅爾城東六十里又東經三架爾帖密莊北沙雅爾城東七十里又東經

沙哈里克湖南又東南五里許折而東至玉古爾莊南同語玉古爾陣奮勇前進之

謂回人曾於此禦敵故名舊作布古爾入塔里木大河水經注云北河東逕龜茲國南又

東左合龜茲川水是也潯于河即龜茲西川矣庫車西北六百餘里通

伊犁路有庫克訥克嶺同語庫克訥克青燕也嶺下水三支南流經庫克訥克卡

倫西又西南流經草嶺西又西南經石嶺西又西南至博勒齊爾山後

蒙古語博勒齊爾謂會合之處左右分注一經其右二經其左二里許滙為一西南流

經銅廠山西庫車城東北六十里至山外經破城東復分為三最西者曰密爾特

彥河南流經沙滿巴克莊城北五里科科弓把莊西城東北三里又南經庫車東

門水經注所謂枝水入龜茲城也又南經稻田東城南里餘薩伊巴克莊西

城東三里又南經喀喇愛里克莊西城西南五里又南經達和賴莊東城東南十里折

而東南流凡百八十餘里入沙哈里克湖次東者曰烏恰爾薩伊河自

分支後東南經胡木里克莊西城東北十五里比架克莊東城東北十里又東南經

喀喇墩莊西城東十五里烏恰爾莊東城東十里又東南經薩罕輝莊西城東南二十里

又東經阿克塔齊莊南城東南二十里又東經魯楚爾莊南城東南三十里又東經博

斯騰莊南城東南十五里又東經寅合莊南城東南四十里又東南經扣庫什莊西

城東南五十里亦百八十餘里入沙哈里克湖最東者曰葉斯巴什河自分支

東流經瑪札普團莊北城東北十五里又東經明邁里雅木阿塔莊北城東北二十里

折而東南流凡五十餘里入阿提委訥克湖諺曰頭道二道三道河即
龜茲東川也水經注曰龜茲川水有二源西源按西源當作西川水出北大山南
其水南流逕赤沙山阿克蘇鹽山又出山東南流枝水左派焉按說文派別水也蓋謂別
出之又東南水流三分右二水俱東南流注北河東川水出一作龜茲
東北厯赤沙積梨南流庫車銅枝水右出東川分入龜茲城其水又東
南流右會西川枝水水入自城東出自城南與西川未入河之左一支
合爲一水即申明此句之文二源俱受西川東流逕龜茲城南
城南合爲一水者即東川枝水右會西川枝水之事其水東南注東川
兩枝水既又東南注大河酈君作注時西川分爲二支先入大河一
支逕城南會東川枝水入東川東川達於河東川入河處在渠犂國西
漢書所謂渠犂西有河至龜茲五百八十里者也今則西川自入河東
川入湖後無復餘水不與河通

又東過庫爾勒莊南

塔里木河自玉古爾莊東流庫車城東北三百二十里爲玉古玉古爾
爾軍臺臺南十里爲玉古爾回莊者漢輪臺地西域傳云輪臺渠犂地相近也莊南四十里有故小城又
南二十里有故大城又南百餘里尤多舊時城郭田疇阡陌畎隴依然
直達河岸疑田官所治矣河水又東二百里逕策特爾軍臺南同語謂
舊曾安營於此故又東一百六十里逕車爾楚軍臺南準語忌諱之詞
名一作策達雅爾又東一百六十里逕車爾楚軍臺南地多古墓經者
多病兩程之間平原衍沃南近河者渠犂故地北近山者烏壘故地漢
於此置都護以爲西域之中河水又東一百七十里逕庫爾勒莊北同
觀望也地形軒敞可供眺覽故名一庫爾勒之境東接哈喇沙爾城西
作庫隴勒莊在庫爾勒軍臺南三里接玉古爾東南至羅布淖爾五百餘里北至多羅嶺二百里玉古爾之
境西接庫車東接庫爾勒南至塔里木河二百四十里北至阿依庫穆

什山回語庫穆七十里各置三品阿奇木伯克一人轄其屬乾隆三十

一年移庫爾勒人六百餘戶於噶札瑪其伯克仍駐庫爾勒領之兩莊

皆哈喇沙爾屬邑地肥饒易樹菽素資瑞傳云附額敏和卓傳乾隆二十四年

徙多倫回眾於哈喇沙爾素資瑞赴玉古爾庫爾勒度引水溉田分地

定居諸務附近兩莊平疇綺壤青翠蔥蘢余以初夏經此潤際麥天雉

雉相應苦豆作花白艸抽帶仰懷鄭吉之風俯念宏羊之策流連緩轡

悵然情深

海都河從北來注之

海都河者哈喇沙爾境水也哈喇沙爾於漢為焉耆危須二國地後屬

回部準噶爾時小策零敦多布據海都河西別為沙拉斯瑪呼斯二鄂

拓克準噶爾有二十四鄂拓克復掠庫爾勒地益之庫爾勒伯克托克托挈弟阿卜

都賚子色提克走吐魯番其屬瑪木特托爾岱從之皆內附雍正九年

寧遠大將軍岳鍾琪奏言自賊營脫回兵丁藍生芝傳說噶勒丹策凌

率部落家口移住哈喇沙爾自是地入準部乾隆二十二年十月戶部

侍郎阿公里袁剿沙拉斯瑪呼斯賊遁往庫車伐樹舉火繼塞山路遂

取間道窮搜山僻至塔本順和爾納木噶獲其眾二百餘二十四年置

辦事一人駐陝西甘肅綠旗馬步兵二百九十五人屯田兵三百二人

其西境直庫車城北之汗騰格里山東百餘里有地曰阿喇爾湧泉

百餘會以東流即大裕勒都斯河同語裕勒都斯星也源發泉如星源處極四十二度

四十五分西三十四度三十分其地土爾扈特卓哩克圖汗所牧也土爾

扈特於四衛拉特為第三乾隆三十六年舊土爾扈特汗渥巴錫與新

土爾扈特台吉舍稜自俄羅斯國之額濟勒河來歸賜舊土爾

扈特曰烏訥恩蘇珠克圖盟設扎薩克十分四路南路由扎薩克卓哩

克圖汗一扎薩克巴雅爾圖貝子一扎薩克輔國公一扎薩克一等台

吉一凡四旗收大裕勒都斯北路曰扎薩克布延圖親王一扎薩克公
品級一等台吉一扎薩克輔國公一凡三旗收塔爾巴哈台之博克
薩里東路曰扎薩克畢錫呼勒圖郡王一扎薩克伊特格勒貝子一凡
二旗收庫爾喀喇烏蘇之濟爾噶朗西路曰扎薩克濟爾哈朗貝勒一
一旗收晶河新土爾扈特曰青色特啟勒圖盟設扎薩克二分二翼左
翼曰扎薩克弼哩克圖郡王一右翼曰扎薩克烏察喇勒圖貝子一凡
二旗收科布多河東流特爾默哈達布拉克準語特爾默蒙古包四圍
木橋也蒙古語謂之哈納
哈達山準語布蘭自南來入之又東與
峯也

小裕勒都斯河會小裕勒都斯出自阿勒坦陰克遜之北源處極四十

三度十分西三十一度三十分和碩特牧地也和碩特於四衛拉特為
第四姓博爾濟吉特元

之後裔始祖曰阿克薩噶勒代諾顏其族有牧額濟勒河者與土爾扈
特同來歸賜曰巴圖色特啟勒圖盟設扎薩克四曰扎薩克土

謝圖貝勒一扎薩克阿穆爾哈貴貝子一扎薩克一等台環繞沮洳檻

吉二凡四旗嘉慶二年貝勒騰特克絕嗣今惟三扎薩克

泉數十涓涓細流逕鄂蘭嶺北有四水自北來入之又西流逕額勒伯
克山北準語額勒伯克豐裕有烏里雅蘇白水準語烏里雅
蘇柳樹也自北來入

之又西南與大裕勒都斯河會處有二水經烏什卡克山東西來匯

地當西域東西之中東達阿拉茨山準語阿拉茨危險
之意舊作阿爾輝西接伊犁空格

斯河源回語空格斯
踏地有聲也準部未靖時自哈密至伊犁者恒取道於茲西陲

紀略載雍正中使臣至準噶爾行程記云自察罕鄂博圖蒙古語鄂博
壘石也地有

白故名住小裕勒都斯九十里途路平坦水艸皆好自小裕勒都斯住

大裕勒都斯八十里路平水艸佳兩裕勒都斯冬夏偕宜惟季春猶雪

飛雲無時遇風即結成糝自此路分兩岐取其捷者自大裕勒都斯六

十里住鄂敦庫爾蒙古語鄂敦星也
準語庫爾謂積雪山口又五十里過鄂敦庫爾嶺若

取其坦者自大裕勒都斯向西南行過烏納罕達罕嶺即空格斯河源

和碩特總傳云諾爾布敦多克游牧額林哈畢爾噶準語額林謂間色
哈畢爾噶謂旁肋

乾隆二十二年西師致討祭額林哈畢爾噶山文曰朕寅紹丕基輯寧
函夏荷百靈之效順美報必伸當萬里之奏功明禋咸秩惟神遐荒迴

時靈應夙昭高塔天山遠通月髓屬當逆賊阿睦爾撒納負恩狡叛竄迹僑棲收拾殘黎誘招諸部復鳴張而起事旋蠶食以逞謀游牧至斯披猖凌甚鄰近皆潛為烏合逆酋漸欲肆螳當已而王旅驟加賊軍輒駭四山草木盡助聲威諸嶺風雲俱增叱咤奔鹿遂不遑擇蔭窮魚乃自絕遊魂雖追躡遁逃又閱時而竣事而摧枯拉朽實從此以振威信乎奉天討以出師明神威祐茲者歲武功而底績秩祀宜申昭右序之文遣祠官而致享永作西陲之鎮鞏邊圉以牧寧二十七年秩於祀典每歲致祭其文曰惟神保障遐方奠基西土層巒內拱在漠南綏靖之前協氣遙迎湖闔外奮揚之日逐飛廉於塞外八公之草木皆兵示象鼎於寰中九牧之神姦悉化輯寧有地報享宜頌朕底定荒陬又安絕域懷柔所及龍堆盡列於版圖撫馭攸加月窟咸通於聲教叛酋潰竄頭屢觸於不周勝旅先登尸遂陳夫貳負稽膚功之迅奏實靈効之克彰用奏明禋永垂嘉典時金方而作鎮著神功於華嶽以西表翠嶂以為屏秩祀典於流沙之外尙期出雲降雨遠敷惠澤於邊疆惟茲酌禮牽牲敬念普存於民力神其來格鑒此苾芬中允饒學曙之詞也在博克達山西八百里哈屯博克達山西一百里博克達山尊如人首額林哈畢爾噶如旁助居元首左右天山最高峯為博克達則左右山皆可謂之額林哈畢爾噶今據告祭所在定為哈屯博克達西百里之山乾隆二十一年將來歸阿睦爾撒納以兵擊諸伊犁之諾羅斯哈濟拜牲蒙古語拜性民居也不勝其族兄沙克都爾曼濟攜子圖們及博爾和津等

和津諾爾布敦多克次子由裕勒都斯至巴里坤又貢格敦丹傳云附阿哩雅傳阿睦爾

撒納叛定西將軍策楞引大軍復赴伊犁貢格敦丹由裕勒都斯閒道

至是其事矣二河自哈爾噶圖山溝逕烏博木萬壑爭流百川迸集奔騰激浪有河經砥柱江出巫峽之險東南流有烏爾圖布拉克準語烏爾圖長

也自北來入之河自此分為二一支東行為南支無所渠并一支東行

為北支首受謨海沙喇布拉克準語謨海不堪之謂沙喇黃色水黃濁不堪飲飲次受什巴爾

台布拉克準語什巴爾台有泥之謂次受賽喇木布拉克次受固爾班努庫爾布拉克

次受察罕烏蘇準語白水次受衰哈布齊勒布拉克準語衰深也東至達蘭

嶺之陰準語達蘭七十數也二河會為一唐書突厥傳永徽五年前軍蘇定方擊

賀魯別帳鼠尼施於鷹娑川回鶻傳言鷹娑川在焉耆西北是其焉耆

之野歟乾隆二十二年都統滿福剿沙拉斯瑪呼斯賊行至哈喇和落

見山徑尤險樹林甚密下有深溝滿福懷疑急收前隊忽賊衆千餘自林內突出截斷我兵滿福大呼殺賊中鎗墜溝沙拉斯之得木齊敦多克哈什哈移戶口踰達蘭嶺毀海都河橋渡佐領麻色等沿河覓路不得蓋水復山重宜爲險地大小裕勒都斯既會東南流有烏蘭烏蘇經博爾圖山谷南流與博爾圖河來匯博爾圖河者發自吐魯番托克遜軍臺之東南北流經軍臺之北折而西經伊拉里克北又西入阿拉癸山口使準噶爾行程記云正月初九日自伊拉里克一百四十里住阿拉癸峪口路途寬濶有碎石將近阿拉癸之地東邊有小河名特克河向西南山峪流去阿拉癸峪內河水清澈樹木成林但行人在兩邊崖坎上下行走駝馬甚苦初十日仍在阿拉癸峪內六十里住過河七八次樹木稠密徑道險窄十一日仍在阿拉癸峪內七十里住倚山口有

土城已壞城內鑿山爲石磴跡記所言皆博爾圖河所經也水西流經

博爾圖山口匯於烏蘭烏蘇又有哈布齊峽水發自哈布齊峽山行程

記云出阿拉癸山口七十里至古爾班登努勒台準語登努勒台濱水

艸俱美周圍皆策妄阿喇布坦僧格之長子綽羅之屬達賴錫拉圖人

居之越二嶺雖有石易行前望西北有三山卽古爾班哈布齊峽山山

三口俱流水自登努勒台踰第一哈布齊峽小山梁凡六十里至中哈

布齊峽山山東爲額林哈畢爾噶山言東者蓋東北自中哈布齊峽山經哈屯

博克達山南峪外準語哈屯顯者妻也博克達山路有石渡河數次峪

內錫拉圖喇嘛之屬居之凡七十里至第三哈布齊峽又自此越察罕

鄂博圖嶺凡百里至察罕鄂博圖途路平坦水艸皆美所謂三山口流

水卽三哈布齊峽河也曰巴倫哈布齊峽河準語巴倫西也多木達哈布齊峽

河準語多木達中也準哈布齊峽河準語準東也向皆滙於烏蘭烏蘇今泉勢微弱出

谷之水僅溉克札一區蒙古田無滙烏蘭烏蘇者烏蘭烏蘇既與裕勒

都斯滙乃東南流是為海都河回語海都曲折之謂流近百里平波息浪王希賢

雜誌云隴西人海都河環繞而來漸近城邊內無卵石玉沙如綿波濤

不驚濤回縹碧斯得其狀矣又東南經哈喇沙爾城西門外五里回語

城久色黑兩岸置軍臺北岸曰河北臺哈喇沙爾轄之南岸曰河南臺庫車轄之河廣三里澄平瀾漫帆

檣出没宛如澤國諺曰通天河極言河廣也哈喇沙爾城乾隆二十三

年建高丈三尺周二百五十四丈東西門二建城之歲正月參贊雅爾

哈善奏言哈喇沙爾通庫車阿克蘇孔道地臨海都河水泉疏衍足資

灌溉請置屯田兵五月辦理屯田侍郎永貴又奏言哈喇沙爾地最廣

海都河水甚足但河身低於渠道須大加修築乃置屯三共田六千四

十畝歲徵糧五千九百五十二石一斗七升二十六年辦事納世通奏

言本年五月哈喇沙爾河水忽長三尺流至城下臣防護屯田處所築

堤二千四百餘丈幸保無虞即海都河所經也河自城西繞至城南折

而東北流七十里經第二工屯田南又東北流數十里經土爾扈特屯

田南又東經和碩特屯田南又東瀝為大澤曰博斯騰淖爾水經注曰

敦薨之水二源俱導蓋以裕勒都斯為西源烏蘭烏蘇水為東源西源東流分為二水此大

勒都斯既西南當作東南下文又言屈而東南西南流出於焉耆之西則西南似指小裕勒都斯源處言之

經流焉耆之野屈而東南流注於敦薨之渚其時小裕勒都斯自入淖爾右水東南

流又分為二此謂大裕勒都斯又分為二左右焉耆之國南會兩水同注敦薨之浦

南會兩水者謂大裕勒都斯分流之兩水至焉耆國南復會為一也東源東南流分為二水俱逕焉耆之

東導于危須國西又東南流注于敦薨之藪其時烏蘭烏蘇水自入淖爾曰渚曰浦

曰藪皆謂此淖爾也淖爾長二百四十里廣四十里極四十二度又八分西自二十八度三十分至二十九度五十九分余自烏沙克塔勒軍臺東行前望山口如樹雙闕落日西銜石瞻海氣蒼茫之色與天相接淖爾西岸有故城雉堞猶存周九里許諺曰四十里城言去鎮城四十里也漢書焉耆國治員渠城袁宏紀作河南城水經注城居四水之中在河水之洲是或員渠遺址歟唐郭孝恪討焉耆焉耆城四面皆水恃險不設備孝恪命將士浮水而度所謂四水之中矣今吐魯番廣安城為古交河城唐之西州貞觀時安西都護治自雅兒湖西南行百里為布幹臺又西南七十里為托克遜臺又南而西入山百里為蘇巴什山溝又東南六十里為阿哈爾布拉克臺又南折而西行庫穆什大山中一百五十里庫穆什者回語謂銀也故唐人謂之銀山郭孝恪帥步騎三千出銀山道是也自此又西一百二十里為哈喇和色爾臺又西一百八十里為烏沙克塔爾臺自此而西今則一百二十里至特博爾古臺唐時則自烏沙克塔爾西南至員渠城不過百里故太宗策孝恪以八月十一日行二十日必至屈利啜之追孝恪自焉耆三日即至銀山

也淖爾南岸東出為磧焉耆之入中國初由磧路隋末閉塞道由高昌

唐時焉耆王突騎支復開磧路故高昌恨之淖爾之北數十里為察罕

通格山準語通格玉草也色白乾隆二十二年駐劄巴里坤辦事阿公里袞奏言

沙拉斯瑪呼斯人眾復叛由察罕通格領游牧過海都河因水勢甚大

遂由喀喇呼珠至烏蘭和屯會合昂吉岱等賊即此山也其山直北山

谷口沙拉斯賊掠臺站都統滿福奏言臣到阿拉葵查看賊人蹤跡進

南山由北路言故曰南山谷口與察罕通格相對南山者博羅圖山準語博羅青色漢書

曰焉耆東北有大山所謂焉耆山即天山矣新疆北路之南面大山皆可謂之天山而漢書屢言

天山則其時必舉一主峯名之晉灼顏師古不能實指其地唐書地理志亦兩岐其說證以漢書匈奴傳西域傳蓋其時所謂天山即今之博羅圖山山在焉耆國之北故又曰焉耆山太平御覽引西河舊事匈奴歌曰亡我祁連山使我六畜不蕃息失我焉支山使我婦女無顏色焉支為焉耆之通借祁連與焉耆並舉正以互文見義非祁連山之外別有焉耆山也蒙古語謂天為騰格里西域有騰格里山今時指為天山

主峯亦非漢書之天山也說詳余漢書西域傳補注博羅圖一作博爾圖乾隆二十六年遣官告祭文曰維神體結坤輿靈昭允位連峯峻峙拔萬仞以倚天積雪高攢歷四時而浮玉作花門之巨鎮永奠西遐界蔥嶺以中維遙通南道朕統臨縣寓式廓輿圖異域歸仁列嶂暨于闐之外殊方在宥與屯踰烏壘而遙乃諸部之往來仰崇山之綿亘雖幽遐不閉久已荷乎天休而梯棧無虞更資乎神應用申秩祀練時日以薦馨敬遣專官肇厥縣而展告自此途開九折共遵王路之蕩平亦惟寒斂六花長被春風之和煦丕彰彤壘來鑒苾芬是歲秩於祀典又頒歲祭文曰維神鍾靈遐域正宅西陲險關蠶叢導我武維揚之路高踰龍阜界殊方內屬之區作巨鎮于回中峯層嶂疊通奧區於域外棧接梯連實惟名山允宜嘉秩朕入荒在闡六合為家既者定乎準夷遂全收乎回部與屯更成宜安枕席以過師駐牧遊羣當順涼暄而應候惟神庥之是賴仰靈貺之攸昭爰申圭幣之儀登諸祀典更肅春秋之祭載在秩宗並協懷柔宜隆盼蠶長此冰消寒嶠調燭被於光天行看雪浹春膏湛恩漸於絕徼苾芬式薦淳爾之側產硝及鹽水復自西南款格斯承皆編修楊述曾之詞也

隅溢出故水經注曰川流所積潭水斯漲溢流為海也乃西南流數十里經海都河之南又西南行百里折而南入山復南折而西經舊煤礦南嘉慶十九年辦事永公芹所開又西半里許經哈勒噶阿璊準語哈勒噶謂

道路言地軍臺南余當盛暑藉艸水濱崖壁險隘危磯吞吐駭浪澎湃

於遮留谷今自庫爾勒北二十里至巖口所謂遮留谷入山徑路崎嶇三十里越大石嶺下逼海都河地處要害或置關也唐岑參有題鐵門關樓及宿鐵關西館詩下嶺十里至哈勒噶阿璊軍臺河水又西行三十餘里出山水經注曰又西出沙山鐵關谷也水又南流二十餘里經庫爾勒莊與軍臺之間莊在南岸又西南漾為葦蕩凡七十里經喀喇布拉克軍臺南二十餘里又西經車爾楚軍臺南而西凡三百里仍曰海都河乃折而南行三百里水經曰其水屈而逕渠犁國西余證地形渠犁為尉犁之誤龜茲東川入河故道在輪臺東敦薨水不得越渠犁也見漢書西域傳補注當其折處水勢彎環漢書鄭吉傳吉發渠黎龜茲諸國五

西域水通言卷二
萬人迎日逐王口萬二千人小王將十二人隨吉至河曲以其曲折斯有河曲之名矣水又折而東入塔里木河

又東注羅布淖爾而伏再出爲黃河

塔里木河自庫爾勒莊東行二百里逕哈喇沙爾城南又東二百餘里逕博斯騰淖爾南又東入于羅布淖爾回語羅布者謂滙水之區吐魯番回部傳云羅布淖爾鄰吐魯番爲巨澤葉爾羌喀什噶爾諸境水六十餘滙之是也漢書地理志敦煌郡正西關外有蒲昌海西域傳蒲昌海一名鹽澤史記大宛傳西至鹽水往有亭是鹽澤亦曰鹽水山海經不周之山北望諸毗之山臨彼岳崇之山東望泐澤河水之所潛也其源渾渾泡泡水經注泐澤水積鄯善之東北龍城之西南龍城故姜賴之虛胡之大國也蒲昌海溢盪覆其國城基尙存而至太晨發西門暮達東門澮其崖岸餘溜

風吹稍成龍形西面向海因名龍城地廣千里皆爲鹽而剛堅也行人所逕畜產皆布羶卧之掘發其下有巨枕以次相累類霧起雲浮寡見星日少禽多鬼怪泐澤廣袤三百里其水澄渟冬夏不減其中洞湍雷轉爲隱淪之脈當其環流之上飛禽奮翮於霄中者無不墜於淵波矣史記正義引括地志云蒲昌海一名泐澤一曰鹽澤亦名輔日海亦名牢蘭海亦名臨海足證淖爾異名矣河源紀略云羅布淖爾爲西域巨澤其地在西域近東偏北全受西偏衆山水共六大支綿地五千里經流四千五百里其餘沙磧限隔潛伏不見者無算以山勢揅之迴環紆折無不趨歸淖爾淖爾東西二百餘里南北百餘里冬夏不盈不縮極四十度三十分至四十五分西二十八度十分至二十九度十分其受水之口今惟一處水經注以爲南北二河各自注澤余按漢

西域傳卷之二
書分兩道。顯言南山北山不見分波。南河北河之文。知一川渠并振古。如茲。酈君所說。容有未審。大淖爾之旁有小淖爾。環之北則圓淖爾。三無名。南則方橢淖爾。四曰鄂爾溝。海圖一曰巴哈噶遜。一曰塔里木池。一無名地。當哈喇沙爾城東南五百里。吐魯番鎮城西南九百餘里。吐魯番者。元時火州地。元史地理志作合刺火者。阿朮傳作哈刺霍州。他紀傳作合刺和州。亦作哈刺火州。巴而朮阿而忒的斤傳。交州卽火州也。統別失八里之地。北至阿朮河。東至元敦甲石哈巴而朮阿而忒的斤曾孫火赤哈兒的斤嗣爲亦都護。至元十二年。都哇卜思巴等率兵十二萬圍火州。聲言曰。阿只吉奧魯只諸王以三十萬之衆。猶不能抗我。而自潰。爾敢以孤城當我鋒乎。亦都護曰。吾聞忠臣不事二主。吾生以此城爲家。死以此城爲墓。終不能從爾也。受圍凡六月。不解。都哇

以書繫矢射城中曰。我亦太祖皇帝諸孫。何以不附我。且爾祖嘗尙公主矣。爾能以女與我。則休兵。不然則急攻爾。其民相與言曰。城中食且盡。力已困。都哇攻不止。則相與俱亡矣。亦都護曰。吾豈惜一女。而不以救民命乎。然吾終不能與之相見。以其女也。立亦里迷失別吉。厚載以茵。引繩墜城下。而與之都哇解去。其後入朝。還鎮火州。屯於州南哈密力之地。兵力尙寡。北方軍忽至。其地大戰。力盡。遂死之。子紐林的斤。遂留永昌。按回紇衙帳本在元之和林。唐末回紇衰弱。轉徙高昌。後役屬耶律大石。元太祖時最先納土。而猶君長其地。逮火赤哈兒的斤入朝。還屯哈密力。考至元二十年四月。立別十八里和州等處宣慰司。則火赤哈兒之不還火州。殆以朝廷設宣慰司故也。旣又爲叛王所殺。回紇于是遂亡。吐魯番鎮城曰廣安。唐之安樂城。其東七十里。爲元火州治。

今日喀喇和卓又東五十里曰魯克沁東漢之柳中城也廣安城西二十里為漢交河城準部之強地為所有康熙六十一年大兵赴吐魯番築城墾地羅布淖爾回人古爾班等率喀喇庫勒句薩達克圖句喀喇和卓等邑千餘眾內附雍正元年將徙之內地以其素習水居不便陸徙乃止乾隆初定喀爾喀與噶勒丹策凌游牧界準噶爾界自克木齊克汗騰格里此非庫車北之汗騰格里山上阿勒坦山梁由索勒畢嶺下哈布山回語哈布囊也山形似之拜山之中拜見過烏蘭烏蘇羅布淖爾直抵噶斯口為界故淖爾眾仍為準部屬而被虐多逃亡向時口二千存者僅六百餘二十三年阿果毅公剿沙拉斯瑪呼斯追禽巴雅爾道經淖爾奏言臣於二月初九日至羅布淖爾地甚寬廣林木深密有回人頭目哈什哈等投見據稱伊等現有六百餘人以漁獵為生四十年前大兵平定吐魯番時將軍曾經招撫賞給緞

布茶葉撤兵之後為準噶爾所據近聞大兵平定準噶爾前年進貢仙鶴臣等詢問羅布淖爾通達何處哈什哈告稱此水甚大周行須兩月餘準噶爾之葉爾羌喀什噶爾等處六十餘河皆滙於此臣等沿途登高瞭望不見崖岸今大兵兩路進剿恐將來有遁逃賊眾隨查明戶口歸併額敏和卓管轄二十六年參贊舒文襄公以羅布淖爾凡兩部落一為喀喇庫勒一為哈喇和卓而喀喇和卓又區為五惟喀喇庫勒一伯克約束難周增置伯克三人轄其眾歲納哈什翎百枝海倫皮九張其人食五穀以魚為糧西域聞見錄云羅布淖爾回人以魚為生時有至庫爾勒者他處則不敢往蓋庫爾勒之東境傍山六十里為庫爾勒其南濱羅布淖爾故得沛流而上織野麻為衣取雁毳為裘藉水禽翼為卧具言語與諸回不通西陲紀略云澤中有山回民居之捕魚採蒲黃而食人多壽百歲以外今其族凡二百八戶男女千二百六十餘口五品伯克三人六品伯克七人領之

改制惟貢獺皮九張每歲吐魯番郡王遣屬受其貢路由吐魯番城南

三十里哈喇二工屯田而南又西南五百餘里經庫穆什大澤東哈喇

城東北五百二十里有庫穆什阿克瑪又南出山自吐魯番至出山陽

軍臺澤在臺南二百四十里官牧場也平沙無人又三日至小淖爾北岸舉火為候淖爾中回人以木筏來迎

小淖爾寬數里達其南岸沙地曠遠海氣鬱蒸胡桐叢生結成林箐即

羅布淖爾北岸也郡王取其貢達於吐魯番領隊淖爾東通燉煌肅州

新志云自沙州之哈喇淖爾正西小徑達羅布淖爾計程不及一月水

經注引漢書西域傳云蒲昌海去玉門陽關千三百餘里也淖爾水伏

流東南千五百餘里涌出於巴顏哈喇山之麓其地曰阿勒坦噶達素

齊老蒙古語噶達素北極星也極三十五度五分西二十度三十五分

齊老石也指石以標其地崖土黃赤飛流歎薄色成黃金是為阿勒坦郭勒乾隆四十七年侍衛

阿彌達窮河源奏言鄂敦塔拉蒙古語塔拉平甸也言平甸數處溪流

其出從北面及中間流出者水皆綠色從西南流出者按流出當水作

黃色臣沿溪行四十餘里水伏流入土隨其痕跡又行二十餘里復見

黃流湧出又行三十里至噶達素齊老地方乃通藏大路也西面一山

山根有二泉流出其色黃詢之蒙番等其水名阿勒坦郭勒此蓋河源

也五十六年廓爾喀酋長侵犯藏界大將軍嘉勇公福康安參贊海公

蘭察惠公齡率兵討之以光祿寺少卿方公維甸兵部郎中長公齡工

部主事巴公哈布內閣中書楊公揆隨行取道甘肅西寧由青海進藏

隆冬寒洳望雪山踰星宿海嘉勇公於五十七年奏言臣於上年十二

月一十二三四等日經過鄂凌扎林淖爾星宿海博勒齊爾喇嘛托羅

海等處地方係黃河發源之地數百里內溪澗交錯泉水甚多冬令處

處凝冰遠近高下竟無路徑後長公為伊犁將軍每為余言其時策騎

以行至鄂敦塔拉則池冰如鏡粲然遙列不識其數鄂敦塔拉者縱廣

百里南北長而東西狹泉數百如星故有星宿海之號阿勒坦郭勒東

北行三百里入其中會碧水黃色稍淡又東出鄂敦塔拉東南流百三

十里瀦為扎凌淖爾一日阿拉出淖爾東南流折而南五十里瀦為鄂

凌淖爾一日車自淖爾東北出東流五十里折而東南百四十里又南

流二百六十里折而東南三百里遼阿彌耶一作阿瑪勒津津一作木遜

山南麓阿彌耶西番語祖也瑪勒津蒙古語又東流折而北又折而西

北凡千六百餘里逕山之東麓迄于克儂渡口山即古大積石今日曰大

雪山此即漢志金城郡河關縣下所云積石山在西南羌中者也自章

懷太子注後漢書誤認龍支縣之小積石為禹貢之積石杜佑踵其謬至蔡傳沿以釋經而大小積石合而為一矣小積石山禹貢所由

導河矣夫自先秦古書言河出崑崙而不言崑崙之所在言河伏流而

不言伏流之所出至漢書始有源出蔥嶺于闐潛流地下南出積石之

文是得河之初源而失其重源唐劉元鼎使吐蕃誤指庫爾坤為崑崙



山巴顏哈喇山阿克塔沁山巴爾布而云河源出其間是失河之初源

重源而並失崑崙元潘昂霄撰河源志以火敦腦兒為河源而誤指大

積石山為崑崙小積石山為禹貢積石是失河之初源重源而並失崑

崙與積石凡此數書歷代言河源者所共宗仰而愈矯愈失去古彌遠

其他附會更何足云自非八荒在宥千載一時淆亂之說疇使辨哉




羅布淖爾所
受水第一圖


羅布淖爾所
受水第二圖

西域水道記卷二

三





南




北

西域水道記卷二

三




羅布淖爾所受水第三圖




羅布淖爾所
受水弟四圖

羅布淖爾所
受水第五圖




西域水道已卷二

三





西域水道已卷二

三




羅布淖爾所
受水第六圖





西域水道記卷二


三六



西域水道記卷二


三七

羅布淖爾所受
水第八圖
海都河



西域圖志卷二

三七



南

北

西域圖志卷二

三七

--	--	--	--	--

